

Pɔlo ɔwɔlɛ Gyangbarasɛ ɔbono ɔ Nmarasɛ Bunge Korinti Awura Mɔ

¹ Me Pɔlo ɔbono Kirisito Yesu gi tɔgɛ me yɛɛ n' baa wɔra mɔ-ɔsɔɔ kyu lii Wurubuaare gelaare so mɔ ne n nmarasɛ genen ɔwɔlɛ baare. Me-rɛ Sositeni, aye-nanbo Yesu ɔson mɔ dɔ, ne n kyu ɔwɔlɛ baare bunge

² fɛye abono fɛ kya son Wurubuaare kyu naa de Yesu so Korinti ɔsowolɛ so mɔ. Kyu lii fɛye-rɛ Kirisito Yesu ginyamesɛ kolon mɔ so mɔ, Wurubuaare gi lɔrɔ fɛye yela sa mɔ-nyoro, ne ɔ tɔgɛ fɛye yɛɛ fɛ' lɔrɔ fɛye-nwɔnsa dɔ yela sa mɔ, ne i mɛn gyɛ fɛye-wolɛ. Fɛye-rɛ abono pɛwu mɛ kya saawo tere aye-Wura Yesu Kirisito gɛten kamaasɛ mɔ ne Wurubuaare dare yɛɛ fɛ' lɔrɔ fɛye-nwɔnsa dɔ yela sa mɔ genen. Yesu Kirisito ne n gyɛ aye-rɛ genen asa abono pɛwu Wura.

³ Aye-sɛ Wurubuaare de aye-Wura Yesu Kirisito mɛ' sa fɛye so gɛwɔnsa dɛnsɛ de mɛ' sa fɛye gisen yuuli.

*Wurubuaare Gi Sa Fɛye Getɔngɛ Dɛnsɛ De
ɔlaako Ginyi*

⁴ N kya faala Wurubuaare fɛye so owi kamaasɛ. I lii fɛɛ fɛye-rɛ Kirisito Yesu ginyamesɛ kolon mɔ so mɔ, Wurubuaare kya sa fɛye so gɛwɔnsa dɛnsɛ.

⁵ Feye-re Yesu ginyamese kolon so mɔ, Wurubuaare gi tansi sa feye getonge dense de olaako ginyi ɔkpa kamaase so.

⁶ I lii fee fe bii feye-asen do yee Kirisito ilaa ibono a toge sa feye mɔ, i gye gesintin.

⁷ Imoso feŋ kya kponderɛ ilaa dense ibono Wurubuaare kya wɔra sa mɔ-asonbo mɔ iko-re iko. Aberɛ abono pewu fe te fe gyoo gɛkaabono Wurubuaare laa lee aye-Wura Yesu Kirisito gɛwi nyiile gesinkpan so asa faa mɔ, ɔ kya sa feye ilaa kamaase ibono i laa yege fe nye yeɛ feye-ayaa so son mɔ dandan mɔ.

⁸ Aye-Wura Yesu Kirisito laa yege fe' nye wɔra ɔlon de fe' wɔra Wurubuaare gɛlaare genen kpaa lii. Imɔ ne nan yege ne i maŋ nye ilaa nyenyɛn iko feye-nyoro so gɛkaabono ɔ laa lii Wurubuaare do ba baa gyi anyamese nbele mɔ.

⁹ Wurubuaare gye ɔpaawɔrabo. ɔ toge feye yee fe' kyu feye-nyoro mada de mɔ-bi aye-Wura Yesu Kirisito.

Fɛŋ Sa Fe' Yege Gesa-Barage Ge' Ba Feye Do

¹⁰ Me-nanboana Yesu asonbo, n de aye-Wura Yesu Kirisito ginyɛn n kya kole feye yee fe' toge kyule abara. Fɛŋ sa fe' yege gesa-barage ge' ba feye do. Nengyɛne fe laa sa gɛwɔnsa ilaa iko so abee fe laa lee ilaa ibono i boran dabole mɔ, fe' kere de fe' wɔra gɛno kolon kpaa loge.

¹¹ Me-nanboana, in gye giyan so ne n' kya toge feye ilaa ide. Kulowe geten do asa ako me buu sa me yee ibiide i bo feye do.

¹² Ilaa ibono ne nu mɔ ne n gye yee feye do ɔkamaase kya toge mɔ-lee kpɛi. ɔde yee, "Me

berε, Pɔɔlo ne n' buu.” Ɔde mɔ yεε, “Apolose ne n' buu,” Ɔbanban mɔ yεε “Sεfase” abεε “Kirisito ne n' buu.”

¹³ Ibono fε baragε faa, n' taase fεye yεε, imɔso fε baragε Kirisito dɔ genen kee? Ibono fεye ako yεε me Pɔɔlo ne fε buu faa, me ne n wu' lεwu oyii mɔ so sa fεye? In gye Kirisito ne n wu' sa aye? Abεε fε nyi yεε me, Pɔɔlo, ginyen dɔ ne mε gyere fεye Wurubuaare sagyere mɔ? In gye Kirisito ginyen dɔ? Fεn sa fε' baragε kpaa buu asa kpεi-kpεi.

¹⁴ I bo me ɔkon yεε in gye me ne n gyere fεye Wurubuaare sagyere, genen mɔ, Kirisipuse mɔ-rε Gayuse wole ne nε gyere Wurubuaare sagyere.

¹⁵ Menan gyere fεye Wurubuaare sagyere mɔ, nkana ɔfaa fεye dɔ ɔko laa tɔgε yεε me, Pɔɔlo, ginyen dɔ ne mε gyere mɔ Wurubuaare sagyere.

¹⁶ (N kya nyingi yεε nε gyere Sitefanase mɔ-rε mɔ-gɛten dɔ asa kee Wurubuaare sagyere. Kyu lii genen asa adε gemara mɔ, mεn baa mi-i nyingi yεε nε gyere ɔko Wurubuaare sagyere.)

¹⁷ I kya nyiile yεε Kirisito mεn sun me yεε n' baa gyere asa Wurubuaare sagyere. O sun me daa yεε n' baa tɔgε mɔ-ɔkalan konkonse mɔ sa asa. N naa mi-i tɔgε ɔkalan mɔ mɔ, mεn kya kyu ɔlaako onyibo adawo atɔngεbi kyu tɔngε sa mɔmɔ. Mεn kya laare i' ba yεε me-atɔngεbi a kya denge asa nwɔnsa lii Yesu lεwu oyii mɔ so de i' ba yεε mεn nye amɔlegε lii mɔ-lεwu mɔ so.

Wurubuaare-Lεε Ɔlaako Ginyi

18 I lii fɛɛ abono mɛ kya fue mɔmɔ-lɛwu gɛmara mɔ, Wurubuaare ɔkalan kyu lii Yesu lɛwu mɔ so mɔ gye daa ilaa gyaga sa ɔmɔ. Aye abono Wurubuaare ti ɔ kya mɔlɛgɛ aye mɔ bere, Wurubuaare ɔkalan kyu lii Yesu lɛwu mɔ so mɔ kya sa aye Wurubuaare Oduduu dɔ ɔlon.

19 Wurubuaare gi yegɛ mɛ nmarasɛ imɔ idɛ so ilaa yela mɔ-agyɛbi mɔ dɔ yɛɛ,

“Nan nyida anyamesɛ-lɛɛ ɔlaako ginyi.

Nan yegɛ asɛɛbo nwɔnsa gi' lɛɛ mɔmɔ tanga.”

20 Nyamesɛ ɔlaako ginyi gi gye ilaa iko sa Wurubuaare? Wurubuaare agyɛbi onyiilebo gɛbelensɛ gɛ laa kpaa mɔ Wurubuaare asɛ? Ne ɔbono o nyi getɔngɛ mɔ, fɛ nyi yɛɛ mɔ-getɔngɛ gɛ laa mɔlɛgɛ mɔ Wurubuaare asɛ? Kuaa! Gɛkyena gɛdɛ dɔ wolɛ ne i laa kpaa mɔmɔ. Wurubuaare gi yegɛ anyamesɛ-lɛɛ ɔlaako ginyi gi kya lɛɛ ɔmɔ tanga fɛɛ ilaa gyaga ne i gye mɔ asɛ.

21 Wurubuaare ɔlaako ginyi so mɔ, ɔ mɛn yegɛ anyamesɛ mɛ' kyu mɔmɔ-lɛɛ ɔlaako ginyi bii mɔ. I bo Wurubuaare ɔbolɛ daa yɛɛ ɔ' mɔlɛgɛ asa abono mɛ kya ka gyan Yesu so mɔ. ɔ kya mɔlɛgɛ mɔmɔ kyu naa de Yesu ilaa ibono a naa a kya tɔgɛ faa so, yegɛ ilaa ibono a kya tɔgɛ faa, asa abono gɛsinkpan so ilaa wolɛ ne n bo mɔmɔ-ansi so mɔ mɛn kya kyu imɔ yɛɛ i gye ɔlaako ginyi.

22 I lii fɛɛ Gyuda awura mɔ mɛ kya tɔgɛ aye yɛɛ a' wɔra ilaa ibono i laa lɛɛ Wurubuaare ɔlon nyiile mɔmɔ pɛi de mɛ' kyule sɔɔ Yesu gyi. Ne Geriiki awura mɔ, mɔ, mɛ kya laare a' tɔgɛ ɔmɔ ɔlaako ginyi agyɛbi pɛi de mɛ' kyule sɔɔ Yesu gyi.

23 Aye berɛ, ilaa ibono a naa a kya tɔgɛ mɔ ne n gye yɛɛ mɛ da Yesu Kirisito ananbi lɛwu oyii so

mɔɔ. Genen so, Gyuda awura men̄ kya laare me' soɔ aye-ilaa togeɛe mɔ gyi. I kya biiri asa sensee kee ansi fɛɛ ilaa gyaga ne i gyɛ.

²⁴ Aye abono pewu Wurubuaare gi toge aye yɛɛ a' kyu aye-nyoro sa mɔ mɔ berɛ, a gyɛ Gyuda awura-o, aŋ gyɛ Gyuda awura daa-o, Kirisito lewu kya yɛɛ a kya nye Wurubuaare olon de Wurubuaare olaako ginyi.

²⁵ I kya nyiile yɛɛ Wurubuaare kya wɔra ilaa ibono fo nyamese ase mɔ in̄ gyɛ olaako ginyi mɔ, fo baa kerɛ mɔ, i ti wɔra olaako ginyi don anyamese-leɛ olaako ginyi gbaa bun, ne Wurubuaare kya wɔra ilaa ibono fo nyamese ase mɔ, in̄ kya nyiile yɛɛ ɔ bo lon, fo baa kerɛ mɔ, i ti wɔra olon ilaa don anyamese-leɛ olon gbaa bun.

²⁶ Me-nanboana Yesu asonbo, ibono anyamese-leɛ olaako ginyi gin̄ gyɛ sei Wurubuaare ase faa mɔ, a' kyu fɛye gbaa-gbaa gidebi taa kerɛ. Owi obono Wurubuaare gi toge fɛye yɛɛ fe' kyu fɛye-nyoro sa mɔ mɔ, abono mɔmɔ-anyen a dii yɛɛ me nyi olaako mɔ, me men̄ kyɔ fɛye dɔ. Genen kee abono me bo nsun bele-bele dɔ mɔ, me men̄ kyɔ fɛye dɔ. Genen kee abono me lii gesu gbaa' dɔ mɔ, me men̄ kyɔ fɛye dɔ.

²⁷ Wurubuaare nyi daa ne ɔ leɛ gibaa yii abono me men̄ nyi olaako mɔ yɛɛ ɔ laa wɔra ilaa gbaa' naa de mɔmɔ so. ɔ leɛ yii abono me men̄ nyi olaako mɔ genen daa de abono me kya ka gyan mɔmɔ-olaako ginyi so mɔ me' nye gyi ipeeli. Genen kee ne Wurubuaare gi leɛ gibaa yii afɔlebo yɛɛ ɔ laa wɔra ilaa gbaa' kyu naa de mɔmɔ so. ɔ leɛ yii afɔlebo mɔ genen daa de alolonbo mɔ, mɔ, me' nye gyi ipeeli.

²⁸ Imɔso Wurubuaare gi lee gibaa yii abono asa men kya kyu tere sei, abono me kere ɔmɔ ta, de abono ba-a me men bo agyan mɔ, yee ɔ laa wɔra ilaa gbaa' kyu naa de mɔmɔ so. Ɔ lee yii ɔmɔ genen daa de o' nyiile abono me bo agyan mɔ yee mɔmɔ anyamese-lee i men gye sei mɔ ase.

²⁹ Wurubuaare kpe ɔ kya kyeege anyamese ilaa genen daa de i' ba yee nyamese ne n gye nyamese ɔ men sa ɔ' nye nyiile mɔ-nyoro mɔ Wurubuaare ase.

³⁰ Wurubuaare ne n yeege ne aye-re Kirisito Yesu a nye wɔra nyamese kolon faa. Ne kyu naa de Yesu so ne a kya nye ɔlaako ginyi ne Wurubuaare kya kyu yee aye-asen dɔ i boran sa mɔ. Kyu naa de Yesu so ne aye-asen a kya kii lɔrɔ fuuli too, ne a nye aye-nyoro lii ilaa nyenyen pewu gemu mɔ abaa dɔ a san a te sa Wurubuaare faa.

³¹ Imɔso i kaabore a' nu ilaa ibono me wolaa ηmarase Wurubuaare agyebi dɔ mɔ. Me ηmarase yee, “Ɔbono ɔ laa nyiile mɔ-nyoro mɔ, ɔ' nyiile mɔ-nyoro kyu naa de aye-Wura bele mɔ so.”

2

Yesu Kirisito Mɔ-re Mɔ-Lewu Ilaa Wolɛ Ne Nan Tɔge Sa Asa

¹ Me-nanboana Yesu asonbo, ne ba feye ase mɔ, men kyu ɔlaako anyibo atongebi baa tonge sa feye. Ne lee daa Wurubuaare gesintin tɔge.

² I lii fee ne wolaa tɔge sa me-nyoro yee abere abono nan nyiile feye ilaa mɔ, nan kyu me-nyoro fee men nyi ɔlaako. Yesu Kirisito mɔ-re mɔ-lewu

ɔbono o wu' sɔɔ aye-nkpa mɔ wolɛ ilaa ne nan tɔgɛ.

³ N bo fɛye aɛɛ n kya nyiile fɛye ilaa mɔ, me-nyoro gi kya da. Mɛn kyu fɛye de ɔlon, nɛ seɛ me-nyoro.

⁴ Yesu lɛwu ilaa ibono nɛ tɔgɛ mɔ de me-atongɛbi mɔ dɔ mɔ, mɛn kyu adawo agyɛbi de ɔlaako anyibo agyɛbi buɛɛɛ fɛye. Wurubuaarɛ Oduduu mɔ ne n kyu mɔ-ɔlon kyu lɛɛ Wurubuaarɛ ilaa nyiile fɛye.

⁵ Ibono so mɛn kyu adawo agyɛbi tɔngɛ mɔ ne n gye yɛɛ mɛn laarɛ fɛɛ fɛ' sɔɔ Yesu gyi kyu lii anyamesɛ-lɛɛ ɔlaako ginyi so. Nɛ laarɛ daa yɛɛ fɛ' sɔɔ mɔ gyi kyu lii Wurubuaarɛ ɔlon mɔ so.

Wurubuaarɛ ɔlaako Ginyi Gi Gye Gesintin

⁶ Imɔ-rɛ imɔ genen gbaa mɔ, nengyene me-rɛ me-nanboana a tɛ saarɛ abono mɛ ti ten ansi Wurubuaarɛ ilaa dɔ mɔ, a kya kyu ɔlaako anyibo agyɛbi tɔngɛ sa mɔmɔ. Gesinkpan so gɛkyena gɛdɛ dɔ asa de mɔmɔ-abelɛnsɛ mɛn kya kyu yɛɛ aye-ɔlaako ginyi gidɛ gi taa gye ɔlaako ginyi. Yɛgɛ mɔmɔ-ɔlon de mɔmɔ-ɔlaako ginyi kya baa yela ɔkara.

⁷ ɔlaako ginyi ilaa ibono a kya lɛɛ tɔgɛ mɔ i gye daa Wurubuaarɛ-lɛɛ ɔlaako ginyi. Genen ɔlaako ginyi mɔ gi gye ilaa boduduusɛ ibono Wurubuaarɛ gi wolaa kyu imɔ nara. Pɛi de soso de gɛsɛ i lɔɔ wora ilɛɛsɛ mɔ, Wurubuaarɛ gi wolaa tɔgɛ mɔ-ilaa boduduusɛ idɛ so ilaa yela yɛɛ a laa nyɛ mɔ-nyisigyɛ kyu naa de imɔ so.

⁸ Abelɛnsɛ abono mɛ kerɛ asa so Yesu gɛkyena abarɛ dɔ mɔ, mɔmɔ dɔ ɔko-rɛ ɔko mɛn nu Wurubuaarɛ ɔlaako ginyi ilaa ibono n darɛ faa

gɛsɛ. Nengyene menan nu imɔ gɛsɛ mɔ, nkana mɛ maŋ da Wura Yesu, Nyisigyi Wura mɔ aŋanbi mada de oyii.

⁹ Gɛnɔɔbono mɛ mɛŋ nu gɛsɛ mɔ, i gye daa ilaa ibono mɛ wolaa ŋmarasɛ Wurubuaarɛ agyɛbi dɔ yɛɛ,

“Ilaa ibono ɔko ansi aŋ ti wu kerɛ,
 ɔko aso aŋ ti nu kerɛ,
 ne ɔko mɛŋ ti taa sa imɔ so gɛwɔnsa kerɛ
 mɔ,
 genen ilaa ibono ne Wurubuaarɛ gi baala yela
 sa asa abono mɛ kya laarɛ mɔ Wurubuaarɛ
 ilaa mɔ.”

¹⁰ Aye abono a kya ka gyan Yesu so mɔ, genen ilaa idɛ ne Wurubuaarɛ gi lɛɛ nyiile aye. Ɔ lɛɛ imɔ nyiile aye naa daa de mɔ-Oduduu mɔ so. I lii fɛɛ mɔ-Oduduu mɔ ne n kya kerɛ ilaa kamaasɛ dɔ dabɔlɛ Wurubuaarɛ gisen dɔ ilaa wu sɔnlii.

¹¹ Ɔko-rɛ ɔko mɛŋ nyi mɔ-nanbo nyamesɛ nwɔnsa dɔ, genen mɔ, kaasɛ gbaa-gbaa oduduu ɔbono ɔ bo mɔ dɔ mɔ wolɛ ne n nyi mɔ-nwɔnsa dɔ. Genen kee ne Wurubuaarɛ Oduduu mɔ wolɛ ne n nyi Wurubuaarɛ nwɔnsa dɔ.

¹² I mɛŋ gye gɛsinkpan so-lɛɛ oduduu ɔnan ne Wurubuaarɛ gi kyu sa aye abono a kya ka gyan Yesu so mɔ. Wurubuaarɛ gbaa-gbaa lɛɛ Oduduu ne o kyu sa aye de a' nyɛ nu ilaa dɛnsɛ ibono ɔ wora sa aye mɔ gɛsɛ.

¹³ Imɔso a kya lɛɛ Wurubuaarɛ ilaa idɛ gɛsɛ a kya sa asa faa mɔ, oduduu dɔ ilaa ne a kya lɛɛ gɛsɛ a kya sa mɔmɔ abono kee Wurubuaarɛ Oduduu mɔ bo mɔmɔ dɔ mɔ. Ne i mɛŋ gye anyamesɛ-lɛɛ ɔlaako ginyi ne a kya kerɛ de a' nyɛ

agyebi abono a laa kyu tonge mɔ. Wurubuaare Oduduu mɔ ne n kya nyiile aye agyebi togesɛ.

¹⁴ Nyamesɛ obono Wurubuaare Oduduu mɔ men bo mɔ do mɔ men kya kyule gesintin gebono Wurubuaare Oduduu mɔ kya nyiile anyamesɛ mɔ. Wurubuaare Oduduu mɔ ilaa nyiilese mɔ i kya biiri mɔ ansi daa, in bo gesɛ sa mɔ, yegɛ Wurubuaare Oduduu mɔ, mɔ, ne n kya kpaanyamesɛ de o' sa imɔ so gewɔnsa baragɛ imɔ do de o' nu gesɛ.

¹⁵ Nyamesɛ obono Wurubuaare Oduduu bo mɔ do mɔ bere kya bii baragɛ ilaa kamaase do nu gesɛ. Mɔ gbaa-gbaa lɛɛ gisen do ilaa mɔ, oko man taale baragɛ imɔ do nu gesɛ.

¹⁶ I de daa fɛɛ agyebi abono me wolaa nmarase yela Wurubuaare do mɔ. Me nmarase yɛɛ,
“Fo anɛ ne n ti taale bii Wura Wurubuaare
nwɔnsa do?”

Fo anɛ ne n ti taale nyiile mɔ ilaa iko?”

Aye abono a bo Wurubuaare Oduduu aye do mɔ bere, a nye Kirisito gewɔnsa onan.

3

Wurubuaare Oduduu Man Baragɛ Feye Do

¹ Me-nanboana, ne wu yɛɛ me-re feye a bo Yesu onon mɔ do bere. Men kii taale tonge de feye fɛɛ genobono n kya tonge de abono Wurubuaare Oduduu bo mɔmɔ do mɔ. Fe tiri daa yɛɛ n' tonge de feye fɛɛ anyamesɛ giyan abɛɛ fɛɛ asa abono men ti taa sɛɛ Yesu Kirisito onon mɔ do mɔ.

² Genen so ne men kyu agyudo boduduuse gyiile feye mɔ. I wɔra fɛɛ ginyabo ne ne sa feye. I lii fɛɛ genen owi obono mɔ, feɲ ti

sɛɛ Wurubuaarɛ ɔson mɔ dɔ de fɛ' taalɛ nu Wurubuaarɛ ilaa boduduusɛ. Baa lii de ndɛ' faa, fɛɲ ti sɛɛ fo genen.

³ Imɔ gɛɛ ne n gye yɛɛ fɛye-gɛkyena dɔ mɔ, fɛ kya kerɛ daa fɛye anyamesɛ-lɛɛ gidebi taa Wurubuaarɛ Oduduu mɔ yɛɛ. Imɔ iko ne n gye yɛɛ fɛ tɛ daa gikoso gɛgyanbusɛ gɛkyena ne ibiide ne n kpɛ i bo fɛye dɔ. Mɔ, i mɛɲ gye anyamesɛ gidebi ne fɛ dɛ fɛ tɛ faa? Fɛɲ dɛ fɛɛ abono mɛɲ nyi Wurubuaarɛ mɔ ne?

⁴ Owi ɔbono fɛye dɔ ako mɛ kya tɔɛ yɛɛ Pɔɔlo abɛɛ Apolose ne mɛ buu faa mɔ, fɛɲ dɛ fɛɛ abono mɛɲ nyi Wurubuaarɛ mɔ ne?

⁵ Apolose ne n gye anɛ, ne me, Pɔɔlo ne n gye anɛ? Aye pɛwu a gye daa Wurubuaarɛ asonbo abono o sun aye fɛye asɛ de fɛ' nye kyu fɛye-nyoro too Yesu so. Wura Wurubuaarɛ ne n kyu ɔkamaasɛ gɛsun wɔrasɛ kyu sa mɔ.

⁶ I dɛ daa fɛɛ me nɛ duu oyii gibi ne Apolose mɔ gi worogɛ gimɔ nkyu. Wurubuaarɛ, mɔ, ne n gye ɔbono ɔ yɛɛ ne oyii mɔ gibi mɔ gi kɔrɔ wɔra oyii fɛye dɔ faa.

⁷ Nyamesɛ ɔbono o duu ilaa ne ɔbono ɔ baa worogɛ imɔ nkyu mɔ, mɔmɔ anyɔ mɛɲ fo Wurubuaarɛ ɔbono ɔ yɛɛ i kɔrɔ mɔ. Mɔ ne n gye.

⁸ Nyamesɛ ɔbono ɔ kya duu de ɔbono, mɔ, ɔ kya worogɛ nkyu mɔ, mɔmɔ ɔko mɛɲ don mɔ-nanbo. Mɔmɔ ɔkamaasɛ laa nye mɔ-ntɛɛla fɛɛ gɛnɔɔbono ɔkara ɔ wɔra mɔ-gɛsun mɔ.

*A' Pɔrɔ Dandan Gyan Wurubuaarɛ Gɛɛ
Ɔpɔɔrɛ Mɔ So*

⁹ Me-re Apolose a gye daa nyamese mɔ-re mɔ-nanbo Wurubuaare agyebi mɔ gesun giwɔra dɔ. Feye, mɔ, ne n gye fɛɛ Wurubuaare ndɔɔ, abɛɛ a' kyu yɛɛ Wurubuaare obu obono ɔ yɛɛ a kya yii mɔ.

¹⁰ Wurubuaare gi kpaɛ me, ne ɔ yɛɛ ne too gɛɛɛ ɔpɔɔre. Mɔ ne n yɛɛ ne wɔra fɛɛ ɔpɔɔrobo dɛnsɛ. I lii fɛɛ me ne n daa gitɔɔɛ Yesu ilaa sa feye. ɔbanban gi ba ɔ kya tɔɔɛ Yesu ilaa ɔ kya sa feye mɔ, i wɔra fɛɛ ɔ kya pɔɔɔ ɔ kya gyan melɛ mɔ so ne. ɔpɔɔrobo kamaase obono ɔ laa baa pɔɔɔ gyan mɔ, ɔ' kere daa de ɔ' pɔɔɔ dandan.

¹¹ Imɔ gɛɛ ne n gye yɛɛ Yesu Kirisito ilaa i dɛ fɛɛ gɛɛɛ ɔpɔɔre obono Wurubuaare gi yɛɛ a' too mɔ. Mɛɲ kya too obu gɛɛɛ ɔpɔɔre ginyɔ.

¹² Ilaa kamaase ibono fo ɔko fo laa san wɔra sa Wurubuaare mɔ, i dɛ fɛɛ fo kya pɔɔɔ fo kya gyan gɛɛɛ ɔpɔɔre mɔ so ne. Sika kɔkɔɔ ne fo laa kyu pɔɔɔ daa-o, abeletɔ fufuli-o, abui ɲɛlegisɛ-o, iyii abɛɛ ifɛ abɛɛ afɛdaa daa-o, aho-o!

¹³ Fo nyamese kamaase fo-gesun wɔrase gebono fo wɔra sa Wurubuaare mɔ gɛ laa lii gɛwi. I lii fɛɛ Wurubuaare laa lɛɛ gɛmɔ-gɛwi nyiile gɛkɛ gebono ɔ laa koola anyamese de ɔ' gyi mɔmɔ-nbele mɔ. Genen gɛkɛ gebono mɔ, gɛmɔ-re ɔgya ne nan naa. ɔgya mɔ laa daase ɔkamaase gesun gebono ɔ baa wɔra sa Wurubuaare mɔ kere yɛɛ gesun gɛmɔmɔ ɔnan ne ɔ wɔra?

¹⁴ Fo obono fo ka gyan Yesu so mɔ, nengyene ilaa ibono fo kyu pɔɔɔ gyan gɛɛɛ-lɛɛ ɔpɔɔre mɔ so mɔ i nyɛ loo ɔgya mɔ dɔ lii mɔ, fo-re fo-ilaa wɔrase pɛwu fo laa loo Wurubuaare ase de fo'

nye ntesela bele Wurubuaare do.

¹⁵ Ne fo obono ogya mo gi deε fo-gesun worase mo, fo wora aworafue ne. Fo gbaa-gbaa bere, fo laa loo ogya mo do lii de Wurubuaare o' molege fo de fo' nye loo mo ase.

¹⁶ Fe men nyi yee Wurubuaare Oduduu mo te feye do? Ibono o te feye do so mo, fe de fee Wurubuaare onon obu mo ne. Imoso

¹⁷ fe' kere dandan. A' kyu yee fo oko fo boori Wurubuaare onon obu mo. Fo nyi yee Wurubuaare laa yee fo? Genen kee ne o man yee fo obono fo laa barage mo-asonbo gikpen mo. I kya nyiile yee o lora feye yela sa mo-nyoro de o' kyena feye do fee mo-onon obu.

¹⁸ Feye oko-re oko on sa o' nyiile mo-nyoro yee o nyi olaako. Fo kya penε fo-nyoro ne. Nengyene fo oko fo nyi yee fo gye olaako onyibo anyamese ase mo, i kaabore fo wora fee obono o men nyi olaako de fo' nye nye olaako ginyi lii Wurubuaare ase.

¹⁹ I kya nyiile yee ilaa ibono anyamese me laa kyu yee i gye olaako ginyi mo, Wurubuaare ase mo, i men gye olaako ginyi ba-a pii faa. Me nmarase yela Wurubuaare agyebi do yee,

“Olaako anyibo yee me nyi olaako mo,

Wurubuaare kya keda daa momo-oduu do.”

²⁰ Ne me nmarase yela kee yee,

“Wurubuaare nyi yee olaako anyibo akyole a gye daa ilaa yanyanse.”

²¹ Imoso oko-re oko o men sa o' nyiile mo-nyoro kyu naa de nyamese so yee, “Ode abee ode ne n' buu.” Gesintin gebono ge bo no mo ne n gye yee in gye nyamese ne fe bo no sa. Feye abono fe kyu

feye-nyoro too Yesu so mɔ, nyamese kamaase de ilaa kamaase i bo no sa feye daa.

²² I gye me Pɔlo-o, Apolose-o abee Sefase-o, i gye daa gesinkpan so ilaa-o, nkpa ilaa-o abee lewu ilaa daa-o, nde geke gedɛ ilaa-o abee geakaako lee-o, nyamese kamaase de ilaa kamaase i bo no daa sa feye.

²³ Feye mɔ, fe bo no sa Kirisito, ne Kirisito, mɔ, bo no sa Wurubuaare.

4

Yesu Laa Baa Lee Nyamese Kamaase Gewansa Do Ilaa Nyiile

¹ Imɔso i kaabore fe' kyu aye Kirisito isoɔ mɔ yee a gye daa mɔ-adega ne o kyu Wurubuaare ilaa boduduuse wɔra aye-abaa do a kya kere imɔ so a-a sa mɔ.

² Nengyene a kya kere mɔ-ilaa so a kya sa mɔ mɔ, ilaa ibono i tiri mɔ ne n gye yee o' wu yee a kya gyi gesintin sa mɔ.

³ Ibono Kirisito ne n' kya gyi gesintin n kya sa faa mɔ, nengyene fee feye abee nbele ogyibo kamaase gi kere me-ilaa wɔrase de o' bun me gipuee mɔ, in tiri me. Me gbaa-gbaa men kya kere me-ilaa wɔrase de n' bun me-nyoro gipuee abee n' sa me-nyoro aso.

⁴ Men kya nyingi yee ilaa ibono ne wɔra ne i laa bun me gipuee mɔ bere. Imɔ ibono i men kya nyiile yee nan gyi aso. Wura Yesu Kirisito ne n gye obono o laa gyi me-nbele de o' bun me gipuee abee o' sa me aso.

⁵ Imoŋso fe meŋ sa fe' bun oko-re oko gipuee abee fo' sa aso pei de i' loo fo owi obono aye-Wura Yesu laa baa gyi anyamese pewu nbele mo. Ilaa ibono i bo gibiri do nperε mo, mo Yesu ne nan baa lee imo-gewi de o' lee nyamese kamaase gewonsa do ilaa nyiile. Genen owi obono ne Wurubuaare laa yen nyamese kamaase genobono okara i kaabore mo mo.

⁶ Me-nanboana Yesu asonbo, ne kyu me-re Apolose ilaa kyu wora sinkaala sa feye de fe' nye kase bii genobono fe laa sii de Wurubuaare ilaa togese mo wole. Fe yele nyamese gemara taa mo- ilaa togese yege mo, in boran. Feŋ sa fe' yele oko gemara nyiile feye-nyoro taa oko yege.

⁷ Fo oko fo nyi yee fo ne n don asa sense? Mene ne fo bo ne i meŋ gye Wurubuaare ne n sa fo imo? Imo pewu i gye Wurubuaare ilaa kyese daa mo, nne so ne fo laa nyiile fo-nyoro?

⁸ Feye Korinti awura fe nyi yee feye-gibaa gi ti yii ilaa kamaase ibono fe kya laare mo ne? Fe ti nye Wurubuaare Oduduu ilaa kyese kamaase ne? Fe nyi yee fe ti wora awuragyibo taa aye yege ne? Ne fee fe gye awuragyibo gesintin mo, nkana i laa wora me okon. I ba genen mo, a laa nye de aye-re feye a' gyi gewura dabole.

⁹ Genobono i de faa mo, i kya wora me fee aye Yesu isoo, abono a gyangbara sa mo-gesun mo, Wurubuaare gi yege a wora gemara awura asa ase. I wora fee Wurubuaare do isoo de anyamese me kpe san me kya lii ma-a kere aye. I de fee a gye daa asa abono me keda tii de ibu, ne me san ma-a lee ma-a mo sansana, asa me yele ma-a kere.

¹⁰ I kya nyiile yεε aye berε a kya pεεrε ansi Yesu gεsun mɔ so gikyɔ so mɔ, a wɔra fεε abono mε mεn nyi ɔlaako asa ase. Feye Korinti awura berε, feye yεε fε gyε ɔlaako anyibo kyu lii Yesu Kirisito so. Aye Yesu isɔɔ mɔ, asa ase mɔ a gyε afɔlebo. Feye berε, asa mε kya kyu feye yεε alolonbo ne fε gyε. Asa mε kya kyu buubuu sa feye. Aye berε asa mεn kya kyu aye tere sei.

¹¹ Kpε kyu lii owi ɔbono a yii Yesu gεsun gεdε gεsε baa lii de ndε mɔ, akon de bolefo ne n kya mɔɔ aye. Apanan ne a kyε. Asa mε kya taa aye gbaa. Anaa-naa ne n gyε aye-lεε.

¹² Yεgε a kya dabɔle nyanga ansi wɔra gεsun de a' kerε aye-nyoro so. Nengyene fεε ako mε kya saale aye mɔ, aye berε, a kya kolε daa Wurubuaare ayuule sa ɔmɔ. Nengyene mε kya ka aye-ansi mɔ, a kya kyu imɔ genen.

¹³ Nengyene mε kya ten aye-gεnɔ mɔ, aye berε, a kya buεεle ɔmɔ daa. Asa ase mɔ, a bingiri fεε gibiinaa abεε mɔmɔ-ayaa ise baa lii de ndε'.

N Kya Ka Feye Fεε Me-Gisen Dɔ Nbii

¹⁴ Mεn kya nmarasε genen ilaa idε mi-i sa feye de i' wɔra feye ipeeli. N kya laare daa de n' ka feye fεε me-gisen dɔ nbii.

¹⁵ Nengyene feye anyiilebo Yesu ɔson mɔ dɔ mε taa nyaakyɔ nne mɔ, ɔsε kolon ne fε bo. Mɔ ne n gyε me. I lii fεε me ne n daa gitɔgε Yesu ɔkalan konkonsε mɔ sa feye ne fε nye kyu feye-nyoro too mɔ so faa.

¹⁶ Imɔso n kya kolε feye. Gεnɔɔbono n de mɔ, fε' kasε me-gidebi.

17 Genen so ne ne keda Timoti n kya sun feye ase faa. Wura Yesu ɔson mɔ dɔ mɔ, Timoti gi baa wɔra fɛɛ me-gisen dɔ obi ɔbono n kya ka gyan mɔ so. Mɔ ne nan nyingi feye me-akyeabi abono n de n te de Kirisito mɔ. Geten kamaase nfono n kya kpe mɔ, genen akyeabi ade ne n' kya kyu nyiile Yesu asonbo gikpen kamaase.

18 Feye ako me nyi yee man baa ba laa feye. Imaso me kya gyiide.

19 Wura Wurubuaare gi kyule mɔ, i man keɛla ne fe laa wu me nno. Ne ba mɔ, nan wu oduduu ɔbono me nye so ne me kya gyiide mɔ. In gye momo-getonge mɔ ne n tiri me.

20 I lii fɛɛ i men gye nyamese getonge giyan ne n kya nyiile yee ɔ ti nye ɔ te Wurubuaare gewuragi dɔ akyeabi mɔ. Wurubuaare Oduduu ilaa wɔrase ibono kaase kya taale wɔra mɔ ne n kya nyiile yee me te Wurubuaare gewuragi dɔ akyeabi mɔ.

21 Nan ba feye ase mɔ, mene ne fe kya laare yee n' kyu ba daa? N' kyu geyabii ba abee n' kyu gesalaare de gitolon-lee getonge kyu ba feye ase kanpe?

5

Fɛ' Gya Ilaa Nyenyɛn Wura Lii Feye-Gikpen Mɔ

Dɔ

1 N kya nu yee oko bo feye Yesu asonbo gikpen mɔ dɔ ɔ kya wɔra ilaayan ibono onan okamaase nyi yee i gye ilaa kpan mɔ. Ba-a asa abono me men kya son Wurubuaare mɔ gbaa me kya kyo imɔ. Imo ne n gye yee onyen oko mɔ-re mɔ-se mɔ-ka me naa gigyibara.

² Ɔnyen baare ɔnan bo fɛye dɔ mɔ, fɛye, mɔ, ne n kya nyiile fɛye-nyoro yɛɛ fɛ gyɛ Wurubuaare asonbo dɛnsɛ? Inj kaabore i' wɔra fɛye ayen daa? Fɛ' gya isa ɔbono ɔ kya wɔra genen ilaa ibono mɔ lii fɛye-gikpen mɔ dɔ.

³ Me-rɛ fɛye a bo gɛta de abara bere. Wurubuaare Oduduu so mɔ, n bo fɛye ase me-nwɔnsa dɔ. Imɔso nɛ ti wolaa kyu aye-Wura Yesu ginyen mɔ bun ɔnyen ɔbono ɔ wɔra genen ilaa kpan ibono mɔ gipueɛ fɛɛ genɔɔbono nkana n bo fɛye ase ne nan wɔra mɔ.

⁴ Owi ɔbono fɛ laa kii gyan dabɔle de fɛ' son Wurubuaare ne me kee n bo fɛye ase me-nwɔnsa dɔ mɔ, aye-Wura Yesu ɔlon dɔ mɔ,

⁵ fɛ' gya genen ɔnyen baare lii fɛye-gikpen mɔ dɔ wɔra ilaa nyenyɛn pɛwu gɛmu mɔ abaa dɔ. I kaabore fɛ' wɔra genen de ɔ' nyɛ kyɛɛɛɛ de i' nyida mɔ anyamesɛ-lɛɛ nwɔnsa nyenyɛn mɔ. Ɔ kyɛɛɛɛ genen mɔ, de ɔ' nyɛ ɔkyenaten Wurubuaare ase gɛkɛ gɛbono Wura Yesu laa kii baa gyi anyamesɛ pɛwu nbele mɔ.

⁶ Fɛ kya nyiile fɛye-nyoro mɔ, inj boran. Fɛ mɛn nyi yɛɛ nyamesɛ kolon ilaa nyenyɛn i laa taale nyida fɛye-gikpen mɔ pɛwu? I dɛ daa fɛɛ genɔɔbono bodobodo gɛlin pi-i ne n kya yɛɛɛ bodobodo kya njan dii mɔ.

⁷ Fɛ' lɛɛ ilaa nyenyɛn kamaase lii fɛye-ayaa dɔ fɛɛ genɔɔbono Gyuda Awura mɛ kya lɛɛ bodobodo gɛlin lii mɔmɔ-ayaa dɔ itiibilaa ɔkpa so de mɛ' nyɛ gyi mɔmɔ-Lɛwu Gi Sereɛɛ Aye So Gɛsi mɔ. Fɛ' wɔra fɛɛ bodobodo maadiise ɔbono Gyuda awura mɛ kya kyu yɛɛ ilaa nyenyɛn iko inj bo mɔ dɔ mɔ. Gesintin mɔ, aye abono a kya

son Yesu mɔ a de fɛɛ genen bodobodo obono. I lii fɛɛ Wurubuaare gi ti kyu Yesu Kirisito lɛɛ asunbi sa aye fɛɛ genɔobono Gyuda Awura me kya kyu sande lɛɛ asunbi mɔmɔ-Lɛwu Gi Serege Aye So Gesi dɔ mɔ.

⁸ Imɔso a' kpe keda ilaa dense giwɔra dɔ de i' wɔra fɛɛ a kya gyi Wurubuaare-lɛɛ gesi gɛkɛ kamaase. An sa a' sa nwɔnsa nyenyen aye-nanboana so. An sa a' wɔra ilaa nyenyen. Ilaa nyenyen i gye daa Wurubuaare ilaa kyose fɛɛ genɔobono bodobodo diise gye agyudɔ kyose sa Gyuda awura gesi gigyi dɔ mɔ. A' gyi gesintin lii aye-asen dɔ de i' wɔra fɛɛ Gyuda awura bodobodo maadiise obono me kya kyu gyi ɔmɔ-gesi itiibilaa okpa so mɔ.

⁹ Ne nmarase tɔge fɛye Yesu asonbo mɔ me-ɔwole oko mɔ dɔ yɛɛ fe men sa fe' kyu fɛye-nyoro mada de asa abono me kya laare agyibara mɔ.

¹⁰ Ne tɔge genen mɔ, in gye abono me men kya son Yesu mɔ ne n' dare. Men kya gya fɛye yɛɛ fen' baa kyu fɛye-nyoro mada de abono me men gye Yesu asonbo ne me kya kudi asa gyi, abɛɛ me kya yuuri abɛɛ me kya son ikpere mɔ daa. Naafɔ genen asa onan ne n' dare mɔ, nkana fe laa lii gesinkpan so daa kpem!

¹¹ Ne nmarase tɔge fɛye daa yɛɛ fen' baa kyu fɛye-nyoro mada de nyamese obono ɔ kya tɔge yɛɛ ɔ gye aye-nanbo Yesu sonbo yɛge ɔ kya laare agyibara mɔ, abɛɛ ɔ kya wɔra onsipara, abɛɛ ɔ kya son okpere, abɛɛ ɔ kya nyida asa anyen, abɛɛ nta ginun gi kya gyi mɔ-gimu, abɛɛ ɔ kya yuuri mɔ. Fɛye-re genen asa abono onan fen sa fe' wɔra abaa gyi gbaa.

12 Me ne n gye ane de n' gyi abono men bo aye Yesu onon mo do mo nbele? Aye Yesu asonbo mo nbele ne i kaabore a' gyi.

13 Wurubuaare ne nan gyi asa abono men bo aye Yesu onon mo do mo-lee nbele. Wurubuaare agyebi a kya nyiile yee,
 "Fe' gya ilaa nyenyen oworabo mo lii feye do."

6

Fe' Tere Abara Yesu Asonbo Wole Wole Ase

1 I wone so ne i kya ba feye Yesu asonbo mo do yee oko gi toro mo-nanbo so de onono, mo, o' da otu kpaa tere mo nbele asa abono me men kya son Yesu mo ase? Fe maa tere abara feye Yesu asonbo wole-wole ase?

2 Fe men nyi yee gekaako mo aye abono a kya son Yesu mo ne nan gyi gesinkpan so asa nbele? To! Nengyene fe laa gyi gesinkpan pewu so-lee nbele genen mo, fe maa taale kere de fe' lora feye-nsinbi nbono gi bo feye do mo?

3 Fe men nyi yee Wurubuaare laa yege de a' gyi Wurubuaare do isoo gbaa nbele gekaako do-o? Mo, gesinkpan so-lee ilaa ne fe maa taale lora?

4 Nengyene fee ilaa ide onan i taa ba feye do mo, i wone ne fe laa kyu imo kperere daa asa abono me men gye asa ako sa Yesu asonbo mo?

5 Fe naabaa ne. Imoso fen bo ba-a olaako onyibo feye do onono o laa bii lora feye wole-wole nbele sa feye?

6 Feye mo ne, fen kii fa-a wora genen. Fe kya liire daa abara kpe asa abono me men kya son Yesu mo ase.

⁷ Feye Yesu asonbo mɔ fe kpe nye tere abara nbele mɔ i kya nyiile yee ilaa nyenyen pewu gemu mɔ ge ti nye feye ne. Fe liire abara mɔ, i laa bara ipeeli sa Yesu ɔson mɔ. Nengyene i' ba feye ɔko so genen mɔ, i' kaabore ɔ' tase tɔge yee, "In gyɛ sei. I' naa-naa. Kaase mɔ ɔ' dabole kudi me gyi."

⁸ Feye, mɔ, feɲ kya wɔra genen. Feye Yesu asonbo mɔ kee fe kya wɔra asa ilaa nyenyen ne fe kya kudi asa gyi. Feye-re feye-nanboana Yesu asonbo mɔ gbaa ne fe de fa-a wɔra genen faa.

⁹ Fe meɲ nyi yee ilaa nyenyen awɔrabo me maɲ nye kyena Wurubuaare ase mɔ-gewuragyi mɔ dɔ? Fe meɲ sa fe' yegɛ de ɔko ɔ' nye feye penɛ. Asa abono me kya laare agyibara, abee me kya son ikpere, abee me kya lii mɔmɔ-kaana abee mɔmɔ-kuliana gemara, abee me kya de de mɔmɔ-nanboana anyen,

¹⁰ abee me kya yuuri, abee me kya wɔra onsipara, abee me kya kyena nun nta geele nyoro, abee me kya nyida asa, abee me kya yuuri geyu pinini mɔ, genen asa abono ɔko-re ɔko maɲ nye kyena Wurubuaare ase mɔ-gewuragyi mɔ dɔ.

¹¹ Nkana feye dɔ ako me wɔra genen asa ade ɔnan yegɛ. Ibono fe nye ka gyan Yesu so mɔ, Wurubuaare gi kpaare feye-ilaa nyenyen fue sa feye, ɔ lɔrɔ feye yela sa mɔ-nyoro, ne o kyu feye yee feye-asen dɔ i boran sa mɔ. Wurubuaare ɔbono a kya son mɔ mɔ Oduduu mɔ gi wɔra ilaa ide pewu sa feye kyu lii aye-Wura Yesu Kirisito so.

Fɛ' Wɔra Ilaa Ibono I Laa Sa Wurubuaare

Nyisigyi

¹² Genobono Wurubuaare gi yegε a nye aye-nyoro so mɔ, fonbii feye dɔ ako me laa tɔge sa mɔmɔ-nyoro yee, “In baa i bo ilaa kyose. A laa taale wɔra ilaa kamaase.” I bo genen bere. Mɔ, i men gye ilaa kamaase mɔ ne n kya kpaa nyamese. “I de okpa yee n' wɔra ilaa kamaase” bere. Mi-i me mɔ man kii wɔra me-nyoro fee gebide sa laawɔra oko de o' gyi me-gimu.

¹³ Abono me kya wɔra ilaayan mɔ me kya tɔge yee, “Wurubuaare gi lee agyudɔ sa daa otɔ ne o lee otɔ mɔ sa agyudɔ.” I gye gesintin bere. Imɔ mɔ, mɔ, Wurubuaare laa baa yela otɔ de agyudɔ pewu okara. O men lee nyamese nyoro sa ilaayan giwɔra. O lee nmo sa Wura Yesu, ne Wura Yesu mɔ kee kya wɔra ilaa dense sa anyamese nyoro.

¹⁴ I lii fee Wurubuaare gi kyingi Wura Yesu nyoro lii ibuni dɔ. Genen kee ne o laa kyingi aye abono pewu a kya ka gyan Yesu so mɔ lii ibuni dɔ naa de mɔ-olon mɔ so.

¹⁵ Imɔso i kaabore feye Yesu asonbo mɔ fe' bii yee Wurubuaare kya kyu imɔ yee feye-nyoro gi de fee Yesu Kirisito nyoro nten kpei-kpei. Ibono me-re Kirisito a wɔra gikolon genen faa, mi-i me mɔ n' kii kpaa de de tutukyii de i' wɔra fee ne kyu Kirisito nyoro mɔ kpaa mada de tutukyii nyoro? Kaasaa!

¹⁶ I kaabore fe' bii yee Wurubuaare kya kyu imɔ yee fo onyen obono fo de de tutukyii mɔ, fo-re genen okyii obono fe bingiri nyamese kolon ne. I kya nyiile yee Wurubuaare gi wolaa yegε me nmarase yela mɔ-agyebi owole mɔ dɔ yee,

“...onyen kya kyu mɔ-nyoro da mada de mɔ-ka ne mɛ kya bingiri nyamesɛ kolon.”

¹⁷ Fo ɔbono mɔ fo-rɛ Wura Yesu fɛ wɔra nyamesɛ kolon mɔ, fɛ wɔra Oduduu kolon ne.

¹⁸ Fɛɲ sa fɛ' laarɛ agyibara abɛɛ fɛ' wɔra ilaayan. Fɛ' seɛ imɔ giwɔra. Ilaa nyenyɛn kamaasɛ ibono fo nyamesɛ fo laa wɔra mɔ i mɛɲ kya yɛgɛ fo tɔrɔ fo-nyoro gibi so. Ilaayan de ogyibara gilaarɛ mɔ berɛ ne fo nyamesɛ fo wɔra mɔ, fo tɔrɔ fo-nyoro gibi so.

¹⁹ Fɛye abono fɛ ka gyan Yesu so mɔ, fɛ' bii yɛɛ fɛye-nyoro gi bingiri obu sa Wurubuaarɛ Oduduu ɔbono ɔ bo fɛye dɔ mɔ. Wurubuaarɛ ne n kyu genen Oduduu ɔbono sa fɛye. Fɛye-nyoro giɲ baa gi gyɛ fɛye-gibaa so lɛɛ.

²⁰ Wurubuaarɛ mɔ-bi gi wu' sɔɔ fɛye ka gikɔ. Imɔso fɛ' kyu fɛye-nyoro kyu wɔra ilaa ibono i laa kyu nyisigyɛ bara Wurubuaarɛ mɔ.

7

Gɛdena Ilaa

¹ Nan tɔngɛ ɔwoɛ ɔbono fɛ ɲmarasɛ me mɔ so ilaa kon. Fɛɛ onyen laa taalɛ kyena yɛɛ ɔ maɲ yii' ɔkyii gɛkaako mɔ, i boran.

² Fonɲii mɔ mɔ, ɔ maɲ taalɛ kyena. I laa naa penɛ mɔ de ɔ' kpaa laarɛ ogyibara so mɔ, i kaabore onyen ɔ' nyɛ mɔ-lɛɛ mɔ-ka de ɔkyii mɔ ɔ' nyɛ mɔ-lɛɛ mɔ-kuli.

³ Onyen ɔbono ɔ dena mɔ, o' kyule yii' mɔ-ka ɔdɛten, de ɔkyii mɔ kee o' kyule de mɔ-kuli o' yii' mɔ.

⁴ I lii fɛɛ ɔkyii gi dena mɔ, iɲ baa i gyɛ mɔ ne n bo mɔ-nyoro gibi. Mɔ-kuli ne n san ɔ bo gimɔ.

Genen kee ne ɔnyen gi dena mɔ in̄ baa i gye mɔ ne n bo mɔ-nyoro gibi. Mɔ-ka ne n san ɔ bo gimɔ.

⁵ ɔnyen mɔ-rɛ mɔ-ka mɛ mɛn̄ sa mɛ' wɔra abara gɛdon ɔɔɛten. Pɛi ne i laa ba yɛɛ fɛ laa kine yɛɛ fɛ maŋ yii' abara ɔɔɛten mɔ, i kaabore fɛye anyɔ fɛ' wolaa tɔgɛ kyule abara yɛɛ genen aberɛ adɛ dɔ mɔ, fɛ maŋ yii abara de fɛ' nyɛ lɔrɔ fɛye-nyoro yela sa gɛdalaa. Gɛdalaa owi mɔ gi kyon mɔ, de fɛ' kii dabɔlɛ ginyen de gikyii. In̄ gye genen mɔ, nengyene fɛ maŋ taalɛ keda fɛye-nyoro mɔ, ilaa nyenyɛn pɛwu gemu mɔ laa soo fɛye idoo de fɛ' wɔra ilaa nyenyɛn.

⁶ Nɛ tɔgɛ yɛɛ i kaabore fɛye ɔkamaasɛ ɔ' nyɛ mɔ-lɛɛ mɔ-ka abɛɛ mɔ-lɛɛ mɔ-kuli faa mɔ, n kya nyiile yɛɛ i dɛ ɔkpa daa. Nkana in̄ gye yɛɛ i gye nbara sa Kirisito sonbo kamaasɛ yɛɛ ɔ' dena.

⁷ Mɛ-lɛɛ gɛlaarɛ dɔ mɔ, nkana ɔnyen kamaasɛ dɛ fɛɛ mɛ de ɔ' taalɛ kyena ɔŋ kya yii' ɔkyii mɔ, nkana n kya laarɛ. Wurubuaarɛ mɔ, gi sa mɔ-sonbo kamaasɛ mɔ-rɛ mɔ-lɛɛ. ɔdɛ-lɛɛ kpɛi. ɔbanban-lɛɛ kee kpɛi.

ɔbono ɔŋ Bo ɔkyii Abɛɛ ɔnyen

⁸ Asa abono mɛ mɛn̄ ti taa dena mɔ, de mɔmɔ abono mɛ gye akulaabo kyiiɛ mɔ berɛ, ilaa ibono nan tɔgɛ mɔmɔ mɔ ne n gye yɛɛ, i boran fɛɛ mɛ' sii kyena mɔmɔ-wolɛ genen fɛɛ genɔɔbono mɛ mɛn̄ dena faa.

⁹ To. Nengyene mɛ maŋ taalɛ keda mɔmɔ-nyoro berɛ mɔ, mɛ' tɛsɛ dena. I boran don ibono ilaayan nwɔnsa gi laa gyi mɔmɔ-amu mɔ.

ɔbono ɔ Dena Mɔ-Nanbo Yesu Sonbo

¹⁰ Feye abono fe dena ne feye anyo fe gye Yesu asonbo mo, n bo nbara nan sa feye. Genen nbara mo ginj lii me ase. Gi lii daa Wura Yesu ase. Imo ne n gye yee okyii on sa o' koso mo-kuli ase.

¹¹ Nengyene i taa ba genen mo, o' tesse kyena, on baa dena obanban. Ne i menj gye genen mo, mo-re mo-kuli mo me' kii loro de me' kyena. Onyen, mo, on sa o' kine mo-ka.

Obono Mo-Ka Abee Mo-Kuli Menj Kya Son Yesu

¹² I san mo (me gbaa-gbaa ne n' kya ka feye kon faa, i menj gye Wura Yesu), nengyene fee fo Yesu sonbo fo bo okyii obono o menj kya son Yesu ne o kyule o te fo ase mo, ginj sa fo' kine mo.

¹³ Genen kee, fo okyii obono fo kya son Yesu mo, nengyene fo-kuli menj kya son Yesu ne o kyule fo te mo ase mo, genj sa fo' kine mo.

¹⁴ I kya nyiile yee kyu naa de ibono fo okyii mo fo kya son Yesu so mo, Wurubuaare gi loro fo-kuli obono on kya son Yesu mo yela sa mo-nyoro. Genen kee ne kyu naa de ibono fo onyen mo fo kya son Yesu so mo, Wurubuaare gi loro fo-ka obono on kya son Yesu mo yela sa mo-nyoro. Inj gye genen mo, nkana Wurubuaare ase mo, feyebiana me laa wora asa abono me bo ineesi. Ide mo faa mo, Wurubuaare gi loro omo yela sa mo-nyoro.

¹⁵ Nengyene fo kya son Yesu ne fo-ka abee fo-kuli obono on kya son Yesu mo kya laare o' kine fo mo, kyule mo. I ba genen mo, gedena nbara ginj baa nminde fo. I kya nyiile yee gisen yuuli so ne Wurubuaare gi toge fo yee fo' son Yesu.

¹⁶ Fo ɔkyii fo maŋ taale bii yee fonɓii mo lii fo so mo, i laa yeege fo-kuli o' kyu mo-nyoro too Yesu so de ɔ' nye Wurubuaare ase gɛkyena. Ne fo ɔnyen mo kee, fo maŋ taale bii yee fonɓii mo lii fo so mo, i laa yeege fo-ka o' kyu mo-nyoro too Yesu so de ɔ' nye Wurubuaare ase gɛkyena.

Wurubuaare ɔson Ne N Tiri

¹⁷ Kyu lii ilaa ide so mo, n bo ilaa nyiilese ibono n kya nyiile Yesu asonbo akpen mo pewu. Imo ne n gye yee: Wurubuaare gi toge fo yee fo' loo mo-ɔson mo do mo, fo loo mo, kpe sii de ibono Wurubuaare gi wolaa kyu sa fo mo. Geŋ toge yee fo laa kine ilaa ibono ɔ wolaa sa fo pei ne fo baa loo mo-ɔson mo do mo.

¹⁸ A' kyu yee me ti wolaa ten fo-giwore pei ne Wurubuaare gi toge sa fo yee fo' loo mo-ɔson mo do. Fo loo mo, geŋ sa fo' kine fo-giwore giten. Ne fee me men ten fo-giwore mo, fo loo Wurubuaare ɔson mo do mo, geŋ toge yee fo laa ten.

¹⁹ Fe ten awore daa-o, fe men ten-o, imo iko i men taa tiri. Ilaa ibono i kpe i tiri mo ne n gye yee fe' gyi daa Wurubuaare nbara mo so.

²⁰ Fo nyamese kamaase, Wurubuaare gi toge fo yee fo' loo mo-ɔson mo do mo, fo loo mo, kpe sii de genɔɔbono fo wolaa fo de pei ne fo loo loo mo.

²¹ A' kyu yee fo te owura ase pei ne Wurubuaare gi toge sa fo yee fo' baa wora mo-lae sonbo. In kya nyida sei. Fee fo bo okpa ɔbono fo laa kyu soge fo-nyoro lii fo-wura mo ase bere mo, i boran.

²² Imo iko-re iko in tiri. I lii fee fo loo Wurubuaare ɔson mo do mo, ba-a ne fo te owura

ase mɔ, Wura Yesu ase mɔ, fo nye fo-nyoro. Genen kee fo loo Wurubuaare ɔson mɔ dɔ mɔ ba-a ne fo te fo-gibaa so mɔ, Yesu Kirisito ne n san ɔ gye fo-wura.

²³ O wu' sa feye. Ɔ sɔɔ feye ka giko. Fɛɲ baa wɔra fɛɛ nbide sa anyamesɛ.

²⁴ Me-nanboana Yesu asonbo, genɔɔbono fe de pei ne Wurubuaare gi tɔge sa feye yɛɛ fe' loo mɔ-ɔson mɔ dɔ mɔ, fe nye loo mɔ, fe' kpe kyena de imɔ genen sa Wurubuaare.

Abono Mɛɲ Dena Mɔ Ilaa

²⁵ Nan tɔnge sa abono mɛ mɛɲ ti dena mɔ kon. Me, Pɔɔlo nan kyu me gbaa-gbaa lɛɛ ilaa ibono n nyi mɔ nyiile feye. In gye yɛɛ aye-Wura Yesu ne n sa me imɔ so nbara berɛ. Imɔ-rɛ imɔ genen mɔ, Wurubuaare gi su me gitolon ne ɔ kpaɔ me. Imɔso fe laa taale ka gyan me so yɛɛ ilaa ibono nan tɔge mɔ i laa kpaɔ feye.

²⁶ Me ase mɔ, i boran fɛɛ feye abono fɛɲ ti dena mɔ fe' tɛɛ kyena fɛɛ genɔɔbono fe te faa. I lii fɛɛ nperɛ gɛkyena ge wɔra ɔlon.

²⁷ In kaabore ɔbono ɔ bo ɔkyii mɔ o' kine mɔ. Ne fo ɔbono fon bo ɔkyii mɔ, gɛɲ sa fo' kerɛ yɛɛ fo laa laare ɔkyii dena.

²⁸ Fo nye ɔkyii fo laa dena berɛ mɔ, fon wɔra ilaa nyenyɛn. Ne ɔkyii mɔ gi nye ɔnyɛn ɔ laa dena mɔ, ɔɲ wɔra ilaa nyenyɛn. Fe dena mɔ, fe laa wu gɛsinkpan so awɔrɔfɔɔ too. Mi-i me mɔ, n kya laare n' lɛɛ feye lii amɔ dɔ daa.

²⁹ Me-nanboana Yesu asonbo, n' tɔge feye yɛɛ gɛke gɛbono Wurubuaare gi yela de o' kyu gyi anyamesɛ pɛwu nbele mɔ gɛɲ baa ge bo gɛta.

Imoso nke nbono gi san mɔ, i kaabore abono me bo akyii mɔ gbaa, me' san peere ansi de Wurubuaare ɔson mɔ fee men bo akyii.

³⁰ Genen kee, i kaabore abono ɔgya gi tɔ mɔmɔ mɔ, me' san peere ansi de Wurubuaare ɔson mɔ fee ɔgya men taa tɔ mɔmɔ. Abono, mɔ, me kya gyi gesinkpan so ɔkon mɔ me' san peere ansi de Wurubuaare ɔson mɔ fee men kya taa gyi ɔkon ɔko. Abono me kya buede mɔ kee, i' wɔra ɔmɔ fee men bo sei de me' nye peere ansi de Wurubuaare ɔson mɔ.

³¹ Asa abono pewu me de gesinkpan so laawɔra dɔ mɔ, men sa me' yege i' gyi ɔmɔ-amu. I kya nyiile yee gesinkpan mɔ gidebi de gemɔ-akyenabi a kya laare a' baa ta ɔkara.

³² Men kya laare fee fe' kyena de nwɔnsa feye-gekyena dɔ. Imoso ne i kaabore fe' kerɛ dandan yee fe laa dena abee fe man dena mɔ. ɔnyen ɔbono ɔn bo ɔkyii mɔ kya nye nyoro sa Wura Yesu gesun de ɔ' laare ɔkpa ɔbono so ɔ laa kyu gyi Wura Yesu ginsi mɔ-gekyena dɔ.

³³ ɔnyen ɔbono ɔ bo ɔkyii mɔ bere, mɔ-nwɔnsa gi gyan gesinkpan so gekyena dɔ ilaa so, i kya nyiile yee ɔ kya laare ikpa ibono so ɔ laa wɔra de i' gyi mɔ-ka ginsi mɔ daa.

³⁴ Imoso mɔ-nwɔnsa gin kya nye gyan Wurubuaare gesun wole so. Genen kee ne gebolonbubii abee ɔkyii ɔbono ɔn dena mɔ kya nye nyoro sa Wura Yesu gesun mɔ. Mɔ-nyoro de mɔ-ginyamese oduduu ɔbono ɔ bo mɔ dɔ mɔ, ɔ kya laare ɔ' lɔrɔ imɔ yela sa daa Wura Yesu. ɔkyii denabo bere, mɔ-nwɔnsa gi kya gyan daa gesinkpan so gekyena ilaa so, ɔ kya laare ilaa

ibono ɔ laa wɔra de i' gyi mɔ-kuli ginsi mɔ.

³⁵ Feye-ɔdan giwɔra so ne n' kya tɔge feye yee fe men dena mɔ, i gye ilaa dense mɔ. In gye yee ne tii feye-gedena daa. N kya laare fe' wɔra daa ilaa ibono i bo kanpe mɔ de fe' nye lɔrɔ feye-nyoro yela sa Wura Yesu kpaa loge. Feye-nwɔnsa gin sa gi' ye ginyɔ.

³⁶ Nengyene fee fo ɔnyen fo-re ɔkyii ansi a den, ne fo nyi yee fo man taale keda fo-nyoro mɔ, fee ɔ fo gedena ne i tiri yee fe' dena mɔ, wɔra ibono i bo fo-gisen dɔ mɔ. Tese kpɔii mɔ de fe' dena abara. I men gye ilaa nyenyen.

³⁷ Nengyene fee fo ɔnyen fo tɔge fo-gisen dɔ yela yee fo man dena, ne fo yeɛ imɔ so, ne sei men nyise fo, ne fo laa taale keda fo-nyoro mɔ, i boran.

³⁸ Imɔso fo ɔbono fo dena ɔkyii mɔ, i boran. Ne fo ɔbono fo men kii dena mɔ, imɔ ibono i boran don.

³⁹ ɔkyii ɔbono ɔ nye dena mɔ, ɔ dena daa. Mɔ-re mɔ-kuli ne kpee'ɛ. Nengyene mɔ-kuli mɔ gi wu' mɔ pei ne ɔ laa nye ɔkpa de o' kii dena. I ba genen mɔ, ɔ bo ɔkpa de o' dena ɔnyen banban ɔbono ɔ bo mɔ ɔbole mɔ. I kaabore kaase o' wɔra daa Wura Yesu sonbo.

⁴⁰ Me ase mɔ, ɔkyii mɔ gi' tese kyena mɔ-nkon mɔ, i laa wɔra ɔdan sa mɔ don ibono ɔ laa kii dena mɔ. Ne sɔɔ gyi yee Wurubuaare Oduduu mɔ ne n bo me dɔ so ne ne taale tɔge genen ilaa ide.

8

Akyɔletɔ Gigyɔ

¹ Kon faa ne nan lɛɛ gɛnɔ sa fɛye kyu lii nbuɛ nbono mɛ kyu akyɔlɛtɔ gigyɪ so. Fɛye yɛɛ, “Aye pɛwu a nyi ilaa idɛ so.” I gyɛ gɛsintin bɛɛ. Ilaa ibono i bo imɔ dɔ mɔ ne n gyɛ yɛɛ nyamesɛ nyi ilaa iko mɔ, ɔ ti taa nyiile mɔ-nyoro. Nyamesɛ bo gɛlaarɛ' bɛɛ mɔ, ɔ kya lɔrɔ daa asa.

² Ɔbono ɔ kya wu mɔ-nyoro yɛɛ o nyi ilaa iko mɔ, kaasɛ mɔ mɛɲ ti taa nyɛ bii ilaa mɔ dɔ fɛɛ gɛnɔɔbono i kaabɔrɛ ɔ' bii mɔ.

³ Mɔ ɔbono, mɔ, ɔ kya laarɛ Wurubuaarɛ ilaa mɔ, mɔ ne Wurubuaarɛ nyi.

⁴ Imɔso kyu lii nbuɛ nbono mɛ kyɔɔlɛ sa ikpɛrɛ mɔ gigyɪ mɔ, fɛɛ gɛnɔɔbono fɛ ɲmarasɛ mɛ mɔ, a nyi yɛɛ “Ɔkpɛrɛ ɔko mɛɲ bo no ɔbono i kaabɔrɛ anyamesɛ mɛ' son mɔ.” A nyi kee yɛɛ, “Wurubuaarɛ kolon ne n bo no ɔbono ɔ kaabɔrɛ anyamesɛ mɛ' son.”

⁵ Ba-a ne i taa bo ilaa ibono mɛ kya tɛrɛ yɛɛ ikpɛrɛ soso abɛɛ gɛsɛ mɔ, fɛɛ gɛnɔɔbono a kya wu asa mɛ kya son ikpɛrɛ de awura kpɛi-kpɛi gbaa faa,

⁶ aye bɛrɛ, a bo daa Wurubuaarɛ kolon a kya son. Mɔ ne n gyɛ ɔsɛ ɔbono ɔ lɛɛ ilaa kamaasɛ, ne a bo no sa daa mɔ. Gɛnɛn kee ne a bo daa Wura kolon. Mɔ ne n gyɛ Wura Yesu Kirisito. Mɔ-rɛ Wurubuaarɛ ne n lɛɛ ilaa kamaasɛ ne kyu naa de mɔ Yesu so ne aye mɔ-asonbo mɔ a nyɛ a bo no faa.

⁷ Fɛ kya tɔgɛ yɛɛ ikpɛrɛ itiibilaa iɲ bo ilaa dɔ mɔ, i mɛɲ gyɛ ɔkamaasɛ ne n nyi gɛnɛn. Ikpɛrɛ ilaa i wolaa den ako. Imɔso baa lii de ndɛ faa, nengyɛnɛ mɛ gyɪ akyɔlɛtɔ mɔ, mɔmɔ-nwɔnsa dɔ i kya wɔra ɔmɔ yɛɛ ɔkpɛrɛ ne mɛ kya son

genen. Men ti ka gyan Wurubuaare agyebi mo so kpaaloge. Imoso me kya gyi mo, i kya nmaa momo-asen yee Wurubuaare kya so ginyadon de omo agyudo abonoana gyi mo so.

⁸ Gesintin mo ne n gye yee aye-agyudo gyi i man taale yee a' gyi Wurubuaare ginsi. A gyi akyooloto mo, i man kpaalaye iko, ne a men kii gyi mo, sei man kyon aye so Wurubuaare ase.

⁹ Fe' kere doodan daa. Ibono fe bo okpa fee fe' gyi agyudo kamaase faa, fonbii mo, i laa yee fe' biide feye-nanboana ako kpaaloo ilaa nyenyen giwora do. I lii fee men ti ka gyan Wurubuaare agyebi so kpaaloge.

¹⁰ A' kyu yee fo obono fo nyi Wurubuaare agyebi dandan mo fo loo okpere obu do kpe fo kya gyi akyooloto. Obono on ti ka gyan Wurubuaare agyebi so kpaaloge mo gi baa wu fo genen mo, fo men nyi yee i laa keda mo-nyoro de o' gyi akyooloto kee? I laa yee mo o' loo okpere gison do nfono.

¹¹ I ba genen mo, ilaa ibono fo yee fo nyi mo so mo, fo-nanbo obono o men ti ka gyan Wurubuaare agyebi so kpaaloge mo laa fue Wurubuaare okpa mo. Yee mo so ne Kirisito gi baa wu'.

¹² Fo obono fo kya wora genen mo, fo kya toro fo-nanbo mo so ne. On ti nye nu Wurubuaare agyebi gese kpaaloge ne fo kya nyida monwonsa. Imoso fo kya toro Kirisito kee so ne.

¹³ Imoso me bere, nengyene ne wu yee me-akyooloto gyi ne nan yee me-nanbo obono o bo Yesu on do mo o' loo ilaa nyenyen giwora

do mo, man gyi amo kpa-a. In gye genen mo, i laa naa ba yee me ne n yee me-nanbo oko gi fue Wurubuaare okpa mo.

9

Pɔɔlo Gi Tɔge Yesu Okalan Sa Asa Mo, On Kyu Mo-Nyoro Too Oko So

¹ Ne tɔge genen faa mo, men bo okpa de n' gyi abee n' wɔra ilaa ibono n kya laare mo daa? Men gye Yesu ɔsoo daa? Men wu aye-Wura Yesu de me-ansi? In gye me n wɔra gesun Wura Yesu olon do ne i yee fe nye bingiri Yesu asonbo faa?

² Imoso nengyene fee asa ako me man soo me gyi yee n gye Wura Yesu ɔsoo mo, feye bere, fe laa soo me gyi. I lii fee feye gbaa-gbaa ne n kya lee nyiile yee Wurubuaare ne n sa me olon de n' tɔge mo-agyebi sa asa.

³ Asa abono me kya taase me-gikoodo barage mo, ilaa ibono n kya buu sa momo mo ne nan nyiile feye gere faa.

⁴ Okamaase nyi yee i de okpa fee aye Yesu isoo mo a' nye gyi de a' nun lii aye-gesun mo giwɔra do.

⁵ Okamaase nyi yee i de okpa fee a' dena akyii abono me kya son Yesu mo. I de okpa yee aye-re omo a' naa a kya wɔra Yesu gesun fee genobono Piita, de Yesu isoo sense, de Wura Yesu motedana mo me kya wɔra mo.

⁶ Yee fe wu yee me-re Banabase bere a kya laare aye-gkyena do ilaa tirise aye-gibaa so bola de aye Yesu isoo gesun mo. Mo, fe nyi yee aye

anyo wole ne n kaabore a' nyaade gisisiri wora nsun nnyo genen?

⁷ Sogya omo ne n kya wora mo-gesun giyan yee me men kya ka mo giko? Doo bo omo ne nan kyule doo giyan yee o man nye imo-agyudo gyi? Inaade okerebo omo ne nan kyule kere inaade so giyan yee o man nun naade ginyabo nkyu?

⁸ I men gye anyamese ilaa wole ne n' kya kere de n' toge ilaa ide. I bo Wurubuaare agyebi owole mo do genen kee.

⁹ Wurubuaare gi yee Oloobu Mosisi gi nmarase nbara yela yee,

“Fo-naade kya daare fo-ayu mo,

gen sa fo' nminde mo-geno de on sa o' we.”

Ilaa ibono Wurubuaare gi toge faa mo, imoso fe nyi yee inaade ne o dare?

¹⁰ I men gye aye anyamese? Me bere n nyi yee aye anyamese so ne Wurubuaare gi yee me nmarase imo yela genen. I lii fee i kaabore nyamese obono o kya baale baale mo de obono o kya daare ayu mo pewu momo-nwansa gi' gyan yee me laa nye momo-lee ogyiten.

¹¹ Aye ne n duu Wurubuaare agyebi mo feye do, ne fe nye odudu do ilaa tirise faa. Imoso a nye gkyena gede do ilaa tirise lii feye ase mo, i kya kyo?

¹² Nengyene fee ako kpei me bo okpa de me' kere feye-ansi do yee fe' sa omo momo-ilaa tirise mo, nkana aye ne n gye abono a kaabore a' kere feye-ansi do gikyo.

Dabole ibono a bo okpa genen gbaa faa, an ti taa wora genen kere. A wora genen mo, fonbii i laa taale yee asa man baa nu Kirisito okalan

konkonse mɔ lii aye ase de me' sɔɔ mɔ gyi. Imɔso ne a kya kyule sɔɔ ilaa kamaase abaa anyɔ.

¹³ Fɛ mɛnɲ nyi yɛɛ asa abono mɛ kya wɔra gesun Wurubuaare ɔson obu mɔ dɔ mɔ mɛ kya nye mɔmɔ-ilaa gyise lii Wurubuaare ɔson obu mɔ dɔ daa? Abono mɛ kya wɔra gesun Wurubuaare asunbi ɔlɛten mɔ, fɛ mɛnɲ nyi yɛɛ mɛ bo mɔmɔ-lɛɛ ogyiten genen akyɔɔlɛtɔ mɔ dɔ?

¹⁴ Imɔso genen kee ne Wura Wurubuaare gi tɔgɛ yɛɛ abono mɛ kya tɔgɛ Yesu ɔkalan konkonse mɔ ma-a sa asa mɔ, mɛ' nye mɔmɔ-gɛkyena dɔ ilaa tirise lii genen gesun gebono giwɔra dɔ.

¹⁵ Wurubuaare gi dabɔle sa aye ɔkpa genen gbaa faa, me Pɔɔlo, mɔ, mɛnɲ kya taa ka imɔ-genɔ. Ne i mɛnɲ kii i gye yɛɛ n kya nmarase ɔwolɛ baare mi-i sa fɛye de fɛ' kere me-ilaa tirise so sa me daa. Nengyene nɛ yɛgɛ fɛ' kere me so genen mɔ, mɛnɲ baa wu nyisigyɪ ilaa ibono n kya wɔra mɔ.

¹⁶ Genɔɔbono n naa mi-i tɔgɛ Yesu ɔkalan konkonse mi-i sa asa mɔ, iɲ kaabore me ne n' nye nyisigyɪ kyu lii imɔ so. Wurubuaare ne yɛɛ n' wɔra genen gesun mɔ. Imɔso fɛɛ nɛ kine yɛɛ maɲ tɔgɛ Yesu ɔkalan mɔ mɔ, me laako.

¹⁷ Ne fɛɛ me ne n kyu gesun gɛdɛ too me-nyoro so mɔ, naafo me-afaala a laa nyaakyɔ don ide Wurubuaare ase. Ibono Wurubuaare ne yɛɛ n' wɔra gɛmɔ faa mɔ, gesun mɔ gɛ gye daa gesola gebono Wurubuaare gi kyu sola me. Imɔso i tiri yɛɛ n' kere gɛmɔ so.

¹⁸ Mɔ, mɛnɛ ne nan wɔra de n' nye nye me-afaala a' nyaakyɔ Wurubuaare ase ne? Ibono nan wɔra mɔ ne n gye yɛɛ nan tɔgɛ Kirisito

okalan mɔ sa asa mɔ, maŋ sɔɔ sei. Nkana i de okpa yɛɛ n' nyɛ me-ilaa tirise lii Kirisito okalan mɔ gesun mɔ dɔ.

¹⁹ I bo no yɛɛ meŋ gye oko dega bere. N kii mi-i wɔra me-nyoro fɛɛ gebide sa okamaase de n' kpaa asa sakyɔ de mɛ' nyɛ nyɛ Wurubuaare ase gekyena.

²⁰ N bo Gyuda awura ase mɔ, n kya wɔra me-nyoro fɛɛ Gyudanyen de n' kpaa Gyuda awura de mɛ' nyɛ Wurubuaare ase gekyena. Meŋ tɛ sa Mosisi nbara mɔ, yɛgɛ owi obono n bo mɔmɔ ase mɔ n kya wɔra me-nyoro fɛɛ obono n tɛ sa Mosisi nbara mɔ de n' kpaa ɔmɔ de mɛ' nyɛ nyɛ Wurubuaare ase gekyena.

²¹ N kya kpe abono meŋ nyi nbara mɔ ase mɔ, n kya wɔra me-nyoro fɛɛ me kee meŋ nyi nbara, yɛgɛ n tɛ sa Wurubuaare nbara nko. Genen nbara mɔ gi gye daa Kirisito nbara.

²² N bo asa abono meŋ ti sɛɛ mɔmɔ-Wurubuaare gisɔɔgyi dɔ mɔ, n kya wɔra me-nyoro fɛɛ mɔmɔ kee de n' kpaa mɔmɔ de mɛ' nyɛ nyɛ Wurubuaare ase gekyena. Me bere, nɛ wɔra me-nyoro fɛɛ anyamesɛ kpɛi-kpɛi kamaase oyuduu de okpa kamaase so mɔ n' nyɛ mɔlegɛ ako de mɛ' nyɛ Wurubuaare ase gekyena.

²³ Kirisito okalan konkonse mɔ so ne n' kya wɔra me-nyoro fɛɛ nyamesɛ kamaase oyuduu genen de me kee n' nyɛ ayuule abono Wurubuaare kya sa asa kyu naa de genen okalan mɔ so mɔ.

*Fɛ' Pɛɛɛ Ansi Wurubuaare Ilaa So Fɛɛ Abono
Mɛ Sele Ɔnangya*

²⁴ Nengyene asa me laa sele onangya de me' wu obono o laa kyon mo-nanbo so mo, momo pewu do mo, fe men nyi yee nyamese kolon ne nan nye gegyangbara afaala? Imoso fe' peere ansi Wurubuaare ilaa so fee onangya ne fe sele de fe' nye genen afaala abono onan.

²⁵ Nyamese kamaase obono o kyu mo-nyoro yee gisele gesun ne o laa wora mo o kya taa ilaa sense yee de o' keda mo-nyoro de o' nu de gisele ilaa wole. Momo bere, me kya peere ansi genen de me' nye afaala. Genen afaala abono, mo, an kya de kpe. Aye a kya peere ansi Wurubuaare ilaa so faa mo, aye-lee afaala a de sa aye gekpaa-gekpaa.

²⁶ Imoso me bere, n kya wora Wurubuaare gesun mo, n kya tansi peere ansi fee onangya ne n' sele. N kya too me-lee akon mo, men kya too amo fue.

²⁷ N kya ken me-nyoro. I kya nu me daa mo, n kya nyise me-nyoro de gi' wora nmoo-okara de inj sa i' ba yee me obono ne toge Wurubuaare agyebi sa asa sense mo, me gbaa-gbaa men nye Wurubuaare afaala.

10

Ilaa Nyenyen Inj Sa I' Gyi Aye-Gimu Fee Adedaabo Mo-Lee Mo

¹ Me-nanboana Yesu asonbo, n kya laare fe' bii ilaa iko kyu lii aye-adedabo so. Owi obono me koso lii Igyipiti me buu Obelense Mosisi me kya kpe mo, Wurubuaare giwole gi bun omo pewu so ne gi gyangbara sa omo. Genen kee ne owi

ɔbono Wurubuaare gi yege apoo mo gi ye ginyo sa omo mo, momo pewu me naa loo lii kyon.

² Kyu naa de genen Wurubuaare giwole mo de apoo mo so mo, i wɔra fee Wurubuaare gi gyere momo pewu mo-sagyere, ne me wɔra Mosisi ade.

³ Momo pewu me gyi agyudo abono Wurubuaare gi yege a lii Wurubuaare do sa omo gipen do mo.

⁴ Momo pewu me nun nkyu nbono Wurubuaare gi yege gi lii gifole do sa omo mo. Genen gifole gibono gi yeke sa Kirisito.

⁵ Wurubuaare gi wɔra ilaa ideana sa omo pewu faa, imo-re imo-laalaaloge mo momo do sakyɔ me men gyi Wurubuaare ginsi. Ne Wurubuaare gi yege me wu'wu nmade gipen mo do.

⁶ Me-nanboana, aye-adedabo ilaa ide i kya ka aye yee a men sa a' yege ilaa nyenyen i' gyi aye-gimu fee genɔbono momo me wɔra mo.

⁷ Fe men sa fe' wɔra ikpere asonbo fee genɔbono momo ako me wɔra mo. Genɔbono ikpere gison gi nyida momo-nwɔnsa mo i bo Wurubuaare agyebi do yee, "Mosisi ade mo me kpe san kyena ne me gyi ne me nun ne me koso ma-a seeli."

⁸ A men sa a' laare agyibara fee genɔbono momo do ako me wɔra ne geke kolon do Wurubuaare gi moo momo do asa nwe gudu-gudu genen gikpado oko gisa' mo.

⁹ Fe men sa fe' yege de a' soo Wurubuaare idoo kere fee genɔbono momo do ako me wɔra ne Wurubuaare gi yege awɔɔ a dun-dun momo mo mo.

¹⁰ Fe men sa fe' logede de Wurubuaare fee

genɔɔbono mɔmɔ ako me wɔra ne Wurubuaare gi yege Wurubuaare dɔ ɔsɔɔ ɔbono ɔ kya mɔɔ asa ka gikɔ mɔ gi baa mɔɔ mɔmɔ mɔ.

¹¹ Wurubuaare gi yege ilaa ibonoana pɛwu i tu aye-adedaaɔ mɔ genen daa de i' nye ka mɔmɔ. Aye so mɔ, Wurubuaare gi yege me ηmarase imɔ yela. Ɔ laare yeɛ aye abono gesinkpan so gɛkyena nke laalaloge mɔ gi baa tu aye faa mɔ a' nye kase ilaa lii imɔ dɔ.

¹² Imɔso fo ɔbono fo nyi yeɛ fo yele fo-ayaa so girin-n Wurubuaare ɔson mɔ dɔ mɔ, wolaa kere dandan de fo meη sa fo' lii tɔrɔ.

¹³ Ilaa ibono i kya soo anyamese idoo de me' wɔra ilaa nyenyen mɔ, imɔ iko in bo no yeɛ imɔ ɔnan in kya ba feye-nanboana anyamese so kee. Wurubuaare mɔ gye ɔpaawɔrabo. Ɔ maη kyule de ilaa iko i' soo feye idoo de i' don feye-abaa. Ɔ laa yege fe' nye ɔkpa lii ɔdoo kamaase dɔ de fe' taale yele feye-ayaa so kpa lii.

Fɛ' Kine Ikperɛ Gison

¹⁴ Imɔso, me-nanboana laarese, fe' kine ikperɛ gison.

¹⁵ N nyi yeɛ fe gye ɔlaako anyibo, imɔso n kya tɔge mi-i sa feye yeɛ feye gbaa-gbaa fe' kere imɔ dɔ de fe' bii yeɛ in kaabore a' gyi akyɔletɔ.

¹⁶ A' kyu aye Kirisito asonbo amenbere mɔ kyu kaala kere. Konkon de nta nbono a kya dalaa kole Wurubuaare ayuule bun nmɔ so mɔ, a nun nmɔ mɔ, aye-re Kirisito a kya wɔra nyamese kolon kyu naa de mɔ-nkalan mɔ so. Genen kee ne a kya gbaa-gbaa bodobodo de a' ye mɔ sa abara. A gyi genen bodobodo ɔbono mɔ, aye-re

Kirisito a kya wɔra nyamesɛ kolon kyu naa de mɔ-nyoro mɔ so.

¹⁷ Bodobodo kolon ne a kya kyu wɔra aye-amenbere abono. Imɔso dabɔle ibono a nyaakyo faa, a gye daa nyamesɛ kolon. I lii fɛɛ aye pɛwu a kya gyi daa bodobodo kolon.

¹⁸ A' kyu aye Isirale awura ilaa kee kaala kere. Dedaa nbara gi kya nyiile yɛɛ abono mɛ gye Wurubuaare asunbi alɛɛbo mɔ wolɛ ne n kya nye gyi ilaa ibono mɛ kyu kyɔɔle sa Wurubuaare mɔ.

¹⁹ To. In gye yɛɛ n kya tɔge yɛɛ ɔkperɛ gye ilaa iko daa abɛɛ akyɔɔletɔ a gye ilaa iko daa.

²⁰ N kya laare fɛ' bii yɛɛ asa abono mɛ mɛn nyi Wurubuaare agyebi mɔ mɛ kya kyɔɔle ikperɛ mɔ, mɛ kya kyɔɔle sa daa ilaa nyenyɛn gemu mɔ isɔɔ. Wurubuaare ilaa kyose ne mɛ kya wɔra. Imɔso mɛn kya laare fɛɛ feye-re ilaa nyenyɛn pɛwu gemu mɔ fɛ' wɔra nyamesɛ kolon.

²¹ Fɛ maŋ taale nun lii Wura Yesu-lɛɛ konkon dɔ de fɛ' kii kpaa nun lii ilaa nyenyɛn gemu isɔɔ-lɛɛ konkon dɔ. Fɛ maŋ taale gyi Wura Yesu agyudɔ de fɛ' kii kpaa gyi ilaa nyenyɛn gemu isɔɔ agyudɔ.

²² In kaabore a' kere Wurubuaare ta. An bo lon don mɔ.

Fɛ' Wɔra Ilaa Ibono I Laa Kyu Nyisigyɛ Bara Wurubuaare Mɔ

²³ Yesu so mɔ, Wurubuaare bo gisen sa aye. Imɔso ako mɛ kya tɔge yɛɛ, “Ilaa kyose in baa i bo no. Imɔso a laa taale wɔra ilaa kamaase ibono a kya laare mɔ.” I bo genen bere. I mɛn gye ikamaase, mɔ, ne n kya kpaa nyamesɛ. “I de ɔkpa yɛɛ a' wɔra ilaa kamaase” bere. I mɛn kii

i gye ilaa kamaase ne n kya kpa aye de a' sɛɛ Wurubuaare ɔson dɔ.

24 Imɔso ɔko ɔɲ sa ɔ' kere mɔ gbaa-gbaa-lee ɔdan giwɔra so. Ɔ' kere daa genɔɔbono mɔnanbo ilaa i laa wɔra ɔdan Wurubuaare ansi so.

25 Fɛ' gyi ginun kamaase gibono mɛ kya fɛ gigyɔ dɔ mɔ. Fɛ mɛɲ sa fɛ' sa gɛwɔnsa yɛɛ fonɓii i laa kyɔlese fɛye-Wurubuaare ɔson so mɔ, fɛ laa taase barage pɛi de fɛ' sɔɔ gimɔ.

26 I lii fɛɛ Wurubuaare agyɛbi dɔ i tɔge yɛɛ, “Gɛsinkpan de ilaa kamaase ibono i bo gɛmɔ so mɔ, i gye daa Wurubuaare-lee.”

27 Nengyene fɛɛ ɔbono ɔɲ kya son Yesu mɔ gi da gibaa tere fɛye ne fɛ kya laare fɛ' kpe mɔ, iɲ gye ilaa nyenyɛn. Fɛ kpe mɔ, fɛ' gyi ilaa kamaase ibono o kyu yii fɛye-ansi dɔ mɔ. Fɛ mɛɲ sa fɛ' tɔge yɛɛ fonɓii i laa kyɔlese fɛye-Wurubuaare ɔson so mɔ, fɛ laa taase barage pɛi de fɛ' gyi.

28 Nengyene fɛɛ ɔko gi buu sa fɛye yɛɛ, “Akyɔɔletɔ ne i gye” bere mɔ, fɛɲ sa fɛ' gyi. I kya nyiile yɛɛ fɛ gyi mɔ, i laa taale kpadɛɛ kaase ɔbono o buu sa fɛye mɔ nwɔnsa kyu lii Wurubuaare ɔson so. Imɔso kaase mɔ-lee nwɔnsa so mɔ,

29 fɛɲ sa fɛ' gyi. Nkana i mɛɲ gye yɛɛ fɛye-lee nwɔnsa so. Ne fɛɛ i mɛɲ gye genɛn kaase mɔ-lee ɔdan giwɔra so mɔ, nkana fo ɔko fo laa tɔge yɛɛ, “N bo ɔkpa de n' gyi ilaa ide. Imɔso i wonɛ so ne ɔko-lee nwɔnsa so mɔ, mɛɲ bo ɔkpa de n' gyi?”

30 Ne nye agyudɔ nan gyi ne nɛ kyu afaala sa Wurubuaare lii amɔ so mɔ, i mɛɲ ta ne? I wonɛ ne ɔko laa baa tɔge sa me yɛɛ nɛ gyi amɔ mɔ, mɛɲ kya son Wurubuaare dandan?”

³¹ Imoso fe laa gyi daa-o, fe laa nun daa-o, ilaa sense iko ne fe laa wɔra daa-o, fe' wɔra imo pewu genɔɔbono i laa kyu nyisigyi bara daa Wurubuaare mo.

³² Feye-nanboana me gye Gyuda awura daa-o, me men gye Gyuda awura daa-o, me gye Yesu asonbo daa-o, fe' kere de fe men' wɔra ilaa ibono i laa yege momo oko o' fue Wurubuaare okpa mo.

³³ Imo ne n' kya wɔra faa. N kya wɔra aniya ilaa kamaase do de n' wɔra ibono i laa gyi nyamese kamaase ginsi mo. In gye me-lee odan giwɔra ne n' kya laare. N kya laare daa asa sakyɔ-lee odan giwɔra genɔɔbono i laa nye molege omo de me' nye Wurubuaare ase gekyena mo.

11

¹ Imoso fe' kase me, Pɔlo, gikyenabi fee genɔɔbono mi-i me mo n kya kase Kirisito gikyenabi mo.

Ɔson Mo Nbara: Akyii Me' Sin Ataa

² N kya yen feye Korinti awura. I kya nyiile yee ne wu yee fe kya nyingi me so ilaa kamaase do, ne anyiilebi abono ne kyu wɔra feye-abaa do mo fe de amo do.

³ N kya laare fe' bii yee onyen kamaase te sa daa Kirisito. Ɔkyii mo te sa daa mo-kuli, ne Kirisito mo te sa Wurubuaare.

⁴ A' kyu yee fe gyan' Wurubuaare osonten ne onyen oko kya laare o' dalaa abee o' lee Wurubuaare okalan oko nyiile mo-nanboana yege o bun gɛpe mo. Ɔn de ipeeli o bun mo-nyoro ne?

⁵ Ne ɔkyii ɔbono ɔ laa dalaa abɛɛ ɔ laa lɛɛ Wurubuaare ɔkalan ɔko nyiile mɔ-nanboana yɛgɛ ɔ mɛɲ sin gitaa mɔ de-e? Ɔɲ dɛ ipeeli o bun mɔ-nyoro kee ne? I kaabore i' wɔra mɔ ipeeli asa ansi dɔ fɛɛ ɔkyii ɔbono mɛ koosi mɔ-gimu mɔ.

⁶ Nengyene ɔkyii maɲ sin gitaa Wurubuaare asonbo ansi dɔ mɔ, ɔ tɛsɛ sɛɛ mɔ-iman mɔ, i bɔ. Ibono iɲ bo ɔbole yɛɛ o' koosi mɔ-gimu abɛɛ ɔ sɛɛ mɔ-iman pɛwu faa mɔ, ɔ' bii yɛɛ i kaabore o' sin gitaa.

⁷ Ɔnyen berɛ, iɲ bo kanpɛ fɛɛ o' bun gɛpɛ Wurubuaare ɔsonten. I kya nyiile yɛɛ Wurubuaare gi lɛɛ mɔ mɔ, ɔ dɛ fɛɛ mɔ Wurubuaare oyuduu. Ɔnyen kya lɛɛ Wurubuaare nyisigyɪ nyiile. Ɔkyii, mɔ, Wurubuaare gi lɛɛ mɔ mɔ, ɔ kya lɛɛ daa ɔnyen nyisigyɪ nyiile.

⁸ Imɔ gɛsɛ ne n gye yɛɛ Wurubuaare mɛɲ lɛɛ ɔnyen lii ɔkyii dɔ. Ɔkyii ne ɔ lɛɛ lii ɔnyen dɔ.

⁹ Ne Wurubuaare mɛɲ lɛɛ ɔnyen sa ɔkyii. Ɔ lɛɛ ɔkyii sa daa ɔnyen.

¹⁰ Genen ilaa ide so de Wurubuaare dɔ isɔɔ so mɔ, i kaabore fɛɛ ɔkyii o' sin gitaa Wurubuaare ɔsonten de i' lɛɛ nyiile yɛɛ ɔ tɛ sa ɔko.

¹¹ Imɔ genen gbaa mɔ, Wura Yesu so mɔ, akyii mɛɲ tɛ mɔmɔ-gibaa so, ne anyen kee mɛɲ tɛ mɔmɔ-gibaa so. Mɛ tɛ sa daa abara.

¹² I kya nyiile yɛɛ genɔɔbono Wurubuaare gi lɛɛ ɔkyii lii daa ɔnyen dɔ mɔ, genen kee ne Wurubuaare kya yɛgɛ ɔkyii, mɔ, kya korogɛ ɔnyen. Ɔkamaase de ilaa kamaase i lii daa Wurubuaare ase.

¹³ Fɛye gbaa-gbaa fɛ' kerɛ, ɔkyii laa dalaa sa Wurubuaare sansana ne ɔ mɛɲ sin gitaa mɔ, i

boran genen?

¹⁴ Fo kerε mɔ, Wurubuaare gi wolaa lεε imɔ yεε ɔnyen iman i wɔra gisoro i kyɔle mɔ i gye ipeeli ilaa sa mɔ.

¹⁵ Ɔkyii berε, nengyene ɔ nye iman i wɔra gisoro i kyɔle de mɔ mɔ, i gye nyisigyɪ sa mɔ. I kya nyiile yεε Wurubuaare gi sa ɔkyii iman de i' wɔra fεε ɔ sin gitaa ne.

¹⁶ Nengyene fεε fɛye dɔ ɔko kya laare ɔ' sɔɔ me akɔɔle ilaa ide so mɔ, ibono nan tɔge sa kaase mɔ ne n gye yεε aŋ bo ilaa wɔrase iko baa too de ide. Ne Yesu asonbo akpen mɔ pɛwu dɔ mɔ, genen ne i de ne.

Aye-rε Wura Yesu Ginyamesε Kolon Agyudɔ Agyibi

¹⁷ Fɛye-ilaa ibono nan baa tɔge faa berε, maŋ taale yen fɛye. I kya nyiile yεε fε kya gyan' fɛye-ɔsonten mɔ, iŋ kya lɔrɔ fɛye, i kya nyida fɛye daa.

¹⁸ Ibono i gyangbara mɔ ne n gye yεε nε nu yεε fɛye Yesu asonbo mɔ fε kya gyan' mɔ, gesabarage ge bo fɛye dɔ, ne nε sɔɔ gyi yεε i laa wɔra gesintin. Gesabarage ge laa nye fɛye dɔ berε.

¹⁹ Imɔ ne nan yεge ɔkamaase ɔ' nye bii asa abono mε kya son Wurubuaare gesintin mɔ.

²⁰ Genɔɔbono fε kya gyan' fɛye-ɔsonten ne fε kya gyi mɔ, iŋ baa i gye aye-rε Wura Yesu ginyamesε kolon agyudɔ mɔ ne fε kya gyi.

²¹ I kya nyiile yεε fε kya gyi mɔ, ɔkamaase kya gyi daa mɔ-lεε agyudɔ. Fo laa kerε mɔ, ako mε gyi kaabo, yεge akon a kya mɔɔ ako. Ako mε kya boo nta yεge ako mεŋ nye nun.

²² I wonε so? Fεη bo nwi fε laa kpe de fε' kpaagyi de fε' nun do-o? Abεε fε kya laare fε' kerε Wurubuaare asonbo gikpen mɔ ta daa? I bo fεye ɔkon yεε fε' wɔra ayenbo abono mε bo fεye dɔ mɔ ipeeli genen? Fεye yεε nne ne n' tɔge sa fεye? N' yen fεye? Maη bii yen fεye.

²³ Ilaa ibono Wura Yesu gi nyiile me mɔ, imɔ ne me kee nε nyiile fεye. Imɔ ne n gye yεε: genye gεbono mε kyu Wura Yesu wɔra mɔ-akyobo abaa dɔ mɔ, mɔ-rε mɔ-akasebo mɔ mε tε mε kya gyi. O puru bodobodo keda,

²⁴ ne o kyu afaala sa Wurubuaare. Ɔ gbaa-gbaa bodobodo mɔ dɔ, ne o kyu sa mɔ-akasebo mɔ, ne ɔ tɔge yεε, “Me-nyoro ne. N dε mi-i sa fεye. Fε' wɔra imɔ idε kyu nyingi me.”

²⁵ Genen kee mε gyi ta mɔ, o puru konkon de nta, ne ɔ tɔge yεε, “Nta ndε gi gye me-nkalan nbono gi laa yεge fεye-rε Wurubuaare fε' nye wɔra genɔ pobɔɔ. Owi kamaase ɔbono fε laa nun nmɔ mɔ, fε' wɔra imɔ idε kyu nyingi me.”

²⁶ Yesu gi tɔge genen faa mɔ, i kya nyiile yεε owi kamaase ɔbono fεye Yesu asonbo mɔ fε laa gyi bodobodo ne fε laa nun nta fafaanan kaabore Wura Yesu laa kii ba mɔ, mɔ-lewu mɔ ilaa ne fε kya lεε fa-a nyiile genen.

²⁷ Imɔso ɔbono ɔ laa gyi genen bodobodo mɔ, abεε o' nun lii genen konkon mɔ dɔ ɔkpa ɔbono so i mεη kaabore mɔ, kaase gi bun mɔ-nyoro gipueε. I kya nyiile yεε ɔ tere aye-Wura nyoro mɔ de mɔ-nkalan mɔ giyan.

²⁸ Imɔso nyamese ɔ' kerε mɔ-gisen dɔ dandan pεi de o' gyi bodobodo mɔ de o' nun lii konkon mɔ dɔ.

²⁹ I kya nyiile yεε i tiri yεε o' nyingi aye-Wura Yesu nyoro nbono ɔ kya gyi mɔ de o' nu nmɔ gεε pɛi de o' gyi bodobodo mɔ de o' nun lii konkon mɔ dɔ. Ɔbono ɔ mɛŋ kya nyingi genen mɔ kya wɔra ilaa ibono i laa yεε Wurubuaare o' bun mɔ gipueε mɔ ne.

³⁰ Imoso ne fε kya wu yεε fɛye sakyɔ mɛŋ bo lon ne mε kya lɔ, ne ako, mɔ, mε kya wu' mɔ.

³¹ Nengyene a kya wolaa kerε aye-asen dɔ dɔɔdan mɔ, Wurubuaare maŋ baa biide aye-giso genen.

³² Wurubuaare gi biide aye-giso genen mɔ, ɔ kya lɔrɔ aye daa de ɔŋ' baa bun aye gipueε kyu dabɔle de asa abono mɛŋ kya sɔɔ mɔ gyi mɔ.

³³ Imoso me-nanboana Yesu asonbo, nengyene fo laa gyan' de fε' gyi aye-rε Wura Yesu ginyamesε kolon agyudɔ mɔ mɔ, fε' kyena gyoo abara.

³⁴ Nengyene akon a laa mɔɔ ɔko ne ɔ maŋ taale kyena gyoo mɔ-nanboana mɔ, o' gyi lii mɔ-gɛten dɔ pɛi de ɔ' lɔɔ kpe fɛye-ɔgyanten mɔ. In gyε genen mɔ, foŋbii mɔ, fε gyan' genen mɔ, fε laa kyu daa Wurubuaare gisobiide bun fɛye-nyoro. I san ilaa sense ibono fε taase mɔ, owi ɔbono nan ba fɛye ase nno mɔ, nan nyiile fɛye imɔ so ilaa.

12

Wurubuaare Oduduu Ilaa Kyεεε

¹ Me-nanboana Yesu asonbo, n kya laare fε' bii Wurubuaare Oduduu mɔ ilaa kyεεε adebi.

² Fε wu yεε owi ɔbono fεŋ ti loo Wurubuaare ɔson dɔ mɔ, ilaa kpei-kpei i ba fɛye-nwɔnsa dɔ, ne i yεε fε son ikperε ibono in kya tɔngε mɔ.

³ Imoso n kya laare fe' bii yee nengyene oko gi toge nno wora Yesu mo, i men gyē Wurubuaare Oduduu mo ne n tonge naa de kaase mo so. Nengyene oko, mo, gi toge yee, "Yesu gyē Wura" mo, Wurubuaare Oduduu mo ne n kpaa mo pei ne o taale toge genen.

⁴ Wurubuaare Oduduu mo ilaa kyee i bo kpei-kpei, yee Wurubuaare Oduduu kolon mo ne n kya kyee imo.

⁵ I bo nsun kpei-kpei nbono Wura Yesu kya kyu wora aye-abaa do, yee mo Wura kolon obono ne.

⁶ I bo ilaa worase kpei-kpei ibono Wurubuaare kya yee mo-asonbo me' wora, yee Wurubuaare kolon obono ne n kya wora mo-ilaa momo okamaase do de me' wora imo pewu.

⁷ Wurubuaare kya laare i' wora odan sa Yesu asonbo akpen pewu. Imoso ne Yesu sonbo kamaase do mo Wurubuaare kya yee mo-Oduduu mo o' lii gewi okpa oko so.

⁸ Oko bo no mo, Wurubuaare kya sa mo olaako ginyi getonge kyu naa de mo-Oduduu mo so. Oko mo mo, Wurubuaare kya yee o kya bii ilaa de o' lee toge sa asa.

⁹ Wurubuaare Oduduu kolon baare kya kyee oko gisogyi boduduuse, ne oko mo, Wurubuaare Oduduu kolon mo kee kya yee mo o' taale kye alo.

¹⁰ Oko mo, kya taale wora ilaa ibono i kya lee Wurubuaare olon nyiile mo. Oko mo, kya nu ikalan lii Wurubuaare ase de o' lee toge. Oko mo, kya bii barage yee Wurubuaare Oduduu mo ilaa worase ne imo ide, abee ilaa nyenyen oduduu-lee

ne imo ide. Ōko mɔ mɔ, Wurubuaare Oduduu mɔ laa yege ɔ laa tɔnge de nde nbono ɔŋ wolaa ɔ kya nu mɔ dɔ. Ōko mɔ bo no mɔ, nengyene fɛɛ fo ɔko fo kya tɔnge de gedɛ geko kpɛi mɔ, ɔ kya bii lɛɛ gɛɛɛ.

¹¹ Imo ideana pɛwu mɔ, Wurubuaare Oduduu kolon mɔ ne n kya wɔra ilaa Yesu asonbo mɔ dɔ de mɛ' wɔra imo genen. Mɔ ne n kya ye imo sa mɔmɔ ɔkamaase genɔɔbono ɔ kya laare mɔ. Ōkamaase mɔ-rɛ mɔ-lɛɛ kpɛi-kpɛi.

Yesu Asonbo Mɛ Gyɛ Gikolon Fɛɛ Nyamesɛ Nyoro Nten Kpɛi-Kpɛi

¹² Nyamesɛ nyoro gi gyɛ daa ilaa kolon, yege fo kere mɔ, gi bo nten kpɛi-kpɛi sakyɔ nmɔ dɔ. Abɛɛ fo kere nyoro mɔ nten kpɛi-kpɛi pɛwu mɔ, gi nyaakyɔ gikyɔ gbaa faa, gi kya taale dabɔle wɔra nyoro kolon. Genen ne Yesu Kirisito asonbo mɛ gyɛ gikolon kee.

¹³ I kya nyiile yɛɛ Wurubuaare gi kyu mɔ-Oduduu mɔ kyu gyere aye Wurubuaare sagyere, ne aye pɛwu a bingiri nyamesɛ kolon. A gyɛ Gyuda awura daa-o, a mɛŋ gyɛ Gyuda awura-o, a tɛ awura ase daa-o, abɛɛ a tɛ aye-gibaa so-o, aye pɛwu a bingiri nyamesɛ kolon ne. Aye pɛwu a nyɛ Wurubuaare Oduduu kolon baare gi suu de aye.

¹⁴ I nyiile fɛɛ aye Yesu asonbo mɔ a mɛŋ gyɛ oyuduu kolon. A gyɛ daa asa kpɛi-kpɛi fɛɛ genɔɔbono nyamesɛ nyoro gi bo giyaa, de giso de ginsi nmɔ dɔ mɔ.

¹⁵ A' kyu yɛɛ nyamesɛ giyaa gi tɔge yɛɛ, “Me berɛ, mɛŋ gyɛ gibaa faa mɔ, mɛŋ too nyamesɛ

nyoro mɔ dɔ.” Giyaa gi taa tɔgɛ genen gbaa mɔ, i maŋ lɛɛ gimɔ lii nyoro mɔ so kpa-a.

¹⁶ Abɛɛ a' kyu yɛɛ nyamesɛ giso gi tɔgɛ yɛɛ, “Mɛŋ gyɛ ginsi faa mɔ, mɛŋ too nyamesɛ nyoro mɔ so.” Giso gi taa tɔgɛ genen gbaa mɔ, i maŋ lɛɛ gimɔ lii nyoro mɔ so kpa-a.

¹⁷ Naafo nyamesɛ nyoro mɔ pɛwu gi gyɛ daa ginsi mɔ, nɛɛ ne ɔ laa wɔra de o' nu ilaa? Mɔ-nyoro mɔ pɛwu gi gyɛ daa giso mɔ, mɔ, nɛɛ ne ɔ laa wɔra de ɔ' songa?

¹⁸ Gɛnɔɔbono i dɛ faa, Wurubuaarɛ ne n lɛɛ nyamesɛ nyoro so ilaa kpɛi-kpɛi, ne o kyu imɔ ikamaasɛ kyu wɔra nyoro dɔ gɛnɔɔbono ɔ kya laarɛ mɔ.

¹⁹ Nkana nyamesɛ nyoro mɔ gi gyɛ daa ilaa kolon guan lii soso kpelegɛ baa yii gɛsɛ mɔ, nɛɛ so ne i laa kyena?

²⁰ Gɛnɔɔbono i dɛ faa, nyamesɛ nyoro so ilaa i kyɔ, yɛgɛ i dabɔlɛ ne i gyɛ nyoro kolon.

²¹ Ginsi gi maŋ taalɛ tɔgɛ sa gibaa yɛɛ, “Lii me so! Fon tiri me.” Ne gimu kee gi maŋ taalɛ tɔgɛ sa giyaa yɛɛ, “Lii me so! Fon tiri me.”

²² Fɛ kya kerɛ mɔ, nyamesɛ nyoro nfono i mɛŋ bo lon mɔ, nfono mɔ ne n tiri mɔ gikyɔ.

²³ Ne nyamesɛ nyoro nfono iŋ gyɛ ilaa gbaa' mɔ, nfono so ne ɔ kya kerɛ dandan. Aye-nyoro nfono iŋ bo gikere mɔ, a kya wolaa kerɛ nfono so dandan.

²⁴ Imɔso gɛnɔɔbono Wurubuaarɛ gi lɛɛ nyamesɛ nyoro mɔ, o kyu nyisigyɛ kyu sa nyoro mɔ nten nbonoana aŋ kya kyu tere sɛi mɔ.

²⁵ Wurubuaarɛ gi wɔra genen de i' nyɛ ba yɛɛ nyamesɛ nyoro gɛten kamaasɛ i kya nu abara

gɛsɛ ne i kya kerɛ abara so.

²⁶ Nengyene nyoro mɔ gɛtɛko i kya yiyɛɛ mɔ, nmɔ-gɛten kamaasɛ kee i kya yiyɛɛ. Nyisigyɛ ne n kii tu nyoro mɔ gɛtɛko mɔ, nmɔ-gɛten kamaasɛ kee i kya gyi okon.

²⁷ To. Idɛ pɛwu i gyɛ daa gikpale. Fɛye Kirisito asonbo mɔ fɛ dɛ fɛɛ Kirisito nyoro. Fɛye dɔ okamaasɛ dɛ fɛɛ Kirisito nyoro mɔ gɛtɛko.

²⁸ I kya nyiile yɛɛ Wurubuaarɛ gi lɛɛ yii mɔ-asonbo kpɛi-kpɛi yɛɛ mɛ' wɔra nsun kpɛi-kpɛi sa mɔ-asonbo gikpen mɔ. ɔ lɛɛ yii Yesu isɔɔ mɔ de mɛ' wɔra agyangbarabo. ɔ lɛɛ yii mɔ-ikalan atɔgɛbo de mɛ' buu omɔ ginyɔsɛ. Abono ɔ lɛɛ de mɛ' buu gisasɛ mɔ ne n gyɛ mɔ-agyɛbi mɔ anyiilebo. Mɔmɔ-gɛmara mɔ, abono mɛ buu mɛ buu mɔ ne n gyɛ abono mɛ kya wɔra ilaa ibono i kya lɛɛ Wurubuaarɛ olon nyiile mɔ, de abono Wurubuaarɛ kya yɛgɛ mɛ' taalɛ kye alɔto, de asa akpaabo, de akpen mɔ ilaa wɔrasɛ mɔ so akɛrɛbo, dɛ abono mɛ kya tɔngɛ de ndɛ kpɛi-kpɛi nbono mɛɲ wolaa mɛ kya nu mɔ.

²⁹ Gɛnɔɔbono Wurubuaarɛ gi wɔra imɔ faa, aye pɛwu ne n gyɛ Yesu isɔɔ mɔ daa? Aye pɛwu a gyɛ Wurubuaarɛ ikalan atɔgɛbo abɛɛ mɔ-agyɛbi mɔ anyiilebo daa? Aye pɛwu a kya wɔra ilaa ibono i kya lɛɛ Wurubuaarɛ olon nyiile mɔ daa?

³⁰ O kyu alɔbi gikye sa aye okamaasɛ? Okamaasɛ kya tɔngɛ de ndɛ nbono ɔɲ wolaa ɔ kya nu nmɔ mɔ? Abɛɛ okamaasɛ kya lɛɛ genen ilaa tɔgɛsɛ mɔ gɛsɛ sa asa?

³¹ Wurubuaarɛ Oduduu mɔ ilaa kyɛsɛ mɔ i bo duduu don abara. Imɔso fɛ' pɛɛrɛ ansi kyu fɛye-nwɔnsa gyan ibono i bo duduu gikyɔ mɔ

so. Imo-rɛ imo genen gbaa mɔ, nan nyiile fɛye akyenabi abono a laa wɔra ɔdan nye ibono nɛ tɔgɛ faa.

13

Gɛlaarɛ' Ne N Tiri

¹ Akyenabi abono a boran mɔ ne n gyɛ ibono fɛ laa laarɛ Wurubuaarɛ de anyamesɛ ilaa. Me ne n kine n' tɔngɛ de Wurubuaarɛ dɔ isɔɔ ndɛ dɔ abɛɛ anyamesɛ-lɛɛ ndɛ nbono mɛɲ wolaa mi-i nu mɔ, ne mɛɲ bo gɛlaarɛ' mɔ, mɛɲ wɔra sɛi. I laa wɔra daa fɛɛ agongon abɛɛ gɛkpenyengelenbi belɛ ne n' kya ɲmɛɛ n kya tii asa aso giyan.

² Genen kee ne nengyene mɛɲ bo gɛlaarɛ' mɔ, ba-a nɛ taalɛ nu ikalan lii Wurubuaarɛ asɛ tɔgɛ sa asa mɔ, mɛɲ wɔra sɛi. Ba-a Wurubuaarɛ gi kpaa me ne nɛ taalɛ nu mɔ-ilaa boduduuse pɛwu gɛsɛ abɛɛ nɛ taalɛ bii Wurubuaarɛ ɔlaako ginyi pɛwu mɔ, ne mɛɲ bo gɛlaarɛ' mɔ, mɛɲ wɔra sɛi. Ba-a Wurubuaarɛ gi kpaa me ne nɛ sɔɔ mɔ gyi ibono nan taalɛ kosorɛ abii gbaa, ne mɛɲ bo gɛlaarɛ' mɔ, mɛɲ wɔra sɛi.

³ Ba-a nɛ kyu me-ilaa ibono n bo mɔ pɛwu kyu kyɛɛ asa, abɛɛ nɛ kyu me gbaa-gbaa nyoro kyu kyɛɛ de mɛ' dɛɛ me Wurubuaarɛ ɔson mɔ so, ne mɛɲ bo gɛlaarɛ' mɔ, i maɲ kpaa me de sɛi Wurubuaarɛ asɛ.

Nyamesɛ ɔbono ɔ Bo Gɛlaarɛ' Mɔ

⁴ Nyamesɛ ɔbono ɔ bo gɛlaarɛ' mɔ kya nye gisen, ne ɔ bo gidɛnsɛ sa asa. ɔɲ bo gɛlaaloo. ɔɲ bo amelimeli. ɔɲ kya nyiile mɔ-nyoro abɛɛ

⁵ ɔ' wɔra ilaa ibono in bo kanpe mo. Isa bo gelaare' mo, on kya kere mo-lee gelaare wole so. On kya nu ginyadon gisoo abee ɔ' keda mo-nanbo ginyadon.

⁶ Ilaa nyenyen in kya wɔra mo okon. Gesintin ilaa ne n kya wɔra mo okon.

⁷ Isa bo gelaare' mo, ɔ laa nye gisen ilaa kamaase do, ɔ laa soo ilaa dense kamaase gyi. Mo-gewonsa ge laa gyan ilaa dense kamaase so, ne ɔ laa soo ilaa kamaase da gikan.

⁸ Gelaare' bere gen bo okara. Wurubuaare gi yegge fo oko fo kya toge mo-ikalan sa asa mo, imo ibono i laa baa yela okara. Wurubuaare gi yegge fo oko fo kya tonge de nde nbono fon wolaa fo kya nu mo, imo ibono kee, i laa baa kyon. Wurubuaare gi yegge fo oko fo kya bii ilaa mo, imo ibono kee, i laa baa yela okara.

⁹ I kya nyiile yee aye anyamese an kya bii ilaa ta, ne an kya toge Wurubuaare ikalan ta.

¹⁰ Owi oko laa baa ba yee Wurubuaare ilaa ibono i boran gekpaa mo i laa ba aye Yesu asonbo mo do. I ba genen mo, aye-ila wɔrase ibono a kya wɔra imo adin-adin mo, i laa yela okara.

¹¹ I de daa fee genobono nyamese kya see baa wɔra obelense mo. Owi obono n gye gebii mo, ne tonge daa fee gebii, ne sa nbii nwonsa ne ne soo akyoolle me-gisen do fee gebii. Owi obono ne baa wɔra obelense mo, ne lii ibiilaa do.

¹² Genen kee ne gekyena gede do mo, a de daa fee nbii. Genobono a nyi Wurubuaare mo, i kere aye-ansi so daa faa futa-a fee diiwu ne n wɔra ineesi. Aberɛ ako a laa baa ba ibono a laa san wu Wurubuaare faa tentegelen. Fee

me faa, n nyi Wurubuaare ilaa daa adin-adin. Gekaako mɔ, nan bii Wurubuaare kpaa loge fεε genɔɔbono Wurubuaare nyi me mɔ.

¹³ Aye-gekyena gedε dɔ mɔ, ilaa isa' wolε ne nan de kpe gekpaa-gekpaa. Imɔ ne n gye gisɔɔgyi gibono a bo sa Wurubuaare mɔ, genɔɔbono aye-ansi a kya gyan Wurubuaare so mɔ, de gelaare' gebono a bo sa Wurubuaare de anyamesε mɔ. Genen ilaa isa' idε dɔ mɔ, gelaare' mɔ ne n don.

14

Ilaa Ibono I Laa Lɔrɔ Yesu Asonbo Gikpen Mɔ

¹ Imɔso ilaa ibono i kaabore fε' kyu too feye-nyoro so don ilaa kamaase mɔ ne n gye yεε fε' laare Wurubuaare de anyamesε ilaa. Imɔ gemara mɔ, fε' pεere ansi yεε Wurubuaare ɔ' kyεε feye oduduu dɔ ilaa kyεεε. Ilaa kyεεε kolon ibono i kaabore fo nyamesε fo' laare don isense mɔ ne n gye yεε Wurubuaare ɔ' tɔge ikalan sa fo de fo' lεε tɔge sa asa. Imɔ ne n kya kpaa Wurubuaare asonbo don ibono fε laa nyε tɔnge de ndε nbono fεη ti nu kere mɔ.

² I kya nyiile yεε nengyene fεε Wurubuaare Oduduu mɔ gi yεge fo kya tɔnge de gedε gebono foη ti nu kere mɔ, foη kya tɔnge de anyamesε. Fo kya tɔnge daa de Wurubuaare, ne ɔko mεη kya nu fo gεε. Ilaa ibono fo kya tɔnge Wurubuaare Oduduu mɔ ɔlon dɔ mɔ i ηara.

³ Isa ɔbono Wurubuaare kya tɔge ikalan sa mɔ de ɔ' lεε tɔge sa asa mɔ mɔ, kya tɔnge daa de anyamesε, ne i kya nyε lɔrɔ ɔmɔ Wurubuaare

gison do. I kya ka omo ne i kya yuule momo-
asen.

⁴ Obono o nye tonge de nde nbono oŋ kya nu mo kya laro daa mo-lee Wurubuaare gison. Obono mo Wurubuaare kya toge okalan ne o kya nu lee toge sa asa mo, Wurubuaare asonbo gikpen mo pewu ne o kya laro.

⁵ Nkana i laa wora me okon yee feye pewu fe' tonge de nde nbono feŋ kya nu mo. Ibono mo i laa wora me okon gikyo mo ne n gye yee feye pewu fe' nye nu Wurubuaare ikalan lee toge sa asa. Obono o nu Wurubuaare okalan ne o kya lee mo toge sa asa mo gi don obono o kya tonge de gedde gebono oŋ kya nu mo. To. Nengyene o tonge ne o laa taale lee imo gese kee bere mo, momo asa anyo mo me gye kyee-kyee ne. I kya nyiile yee genen ne i laa nye laro Wurubuaare asonbo pewu gikpen mo.

⁶ Me-nanboana Yesu asonbo, nengyene ne ba feye ase ne ne kyu Wurubuaare Oduduu n kya tonge de gedde gebono fe men kya nu ne men kii lee gese sa feye mo, nne ne me-ilaa toge i laa nye kpa feye? Men kii lee Wurubuaare ilaa iko gewi sa feye abee n' kyu Wurubuaare olaako ginyi abee mo-okalan oko abee mo-ilaa nyiilese iko kyu nyiile feye.

⁷ Ilaa ibono i men kya songa gbaa fee ngandan de aduuleana, nengyene fee oko gi fole abee o lan ne in kya lii mo, nne ne fe laa wora de fe' bii olon mo kyule?

⁸ Fee obono o kya da iko gegandan so mo men kya bii fole gemo mo, nne ne mo-ade me laa wora de me' bii yee iko i tu momo?

⁹ Genen kee ne i de sa feye ne. Nengyene fe laa tonge ne fe man tonge de asa me' nu gese mo, fe laa tonge sa daa afuu. Oko man bii ilaa ibono fe dare mo.

¹⁰ I bo nde kpai-kpai gikyo gesinkpan so. Ne a nyi yee nmo pewu gi bo gese.

¹¹ Nengyene me-re oko an kya nu abara nde mo, a wora fee asafu sa abara ne.

¹² Imoso ibono feye-ansi a peere yee Wurubuaare Oduduu mo o' wora ilaa feye do faa mo, fe' tese kole mo yee ilaa ibono i laa loro Wurubuaare asonbo pewu mo ne i' nyaakyo feye do.

¹³ Imoso fo obono Wurubuaare Oduduu mo gi yege fo taale tonge de gede gebono fon kya nu mo, dalaa kole Wurubuaare kee yee o' kpaa fo de fo' taale lee imo gese.

¹⁴ I lii fee nengyene nan taale tonge de gede gebono men ti nu kere mo, i laa lii daa oduduu obono o bo me do mo ase. Me-nwansa do mo men nyi ilaa ibono i gye mo.

¹⁵ To. Mo, nne ne i kaabore n' wora? Ibono ne wu mo ne n gye yee i kaabore n' dalaa daa lii me-oduduu mo do, de n' kii dalaa kee lii me-nwansa do. I kaabore n' bii ilon sa Wurubuaare lii me-oduduu mo do, de n' kii bii ilon kee lii me-nwansa do.

¹⁶ In gye genen mo, ne fee fo oko fo kya faala Wurubuaare gede poboro do lii fo-oduduu mo do mo, abono me te me kya nu mo me man nu gese de me' faala mo kpaa fo. Men nyi ilaa ibono fo kya toge mo.

¹⁷ Fo-afaala abono ne n kine a boran nne mo, a man kpaa fo-nanbo mo de sei.

18 N kya faala Wurubuaare fɛɛ mɔ-Oduduu mɔ gi yɛgɛ me n kya taalɛ tɔngɛ de ndɛ nbono mɛn ti nu kerɛ mɔ don fɛyɛ ɔkamaasɛ.

19 Imɔ mɔ mɔ, owi ɔbono n tɛ Yesu asonbo mɔ nsana mɔ, i boran sa me yɛɛ n' tɔgɛ daa lii mɛgɛwɔnsa dɔ gikyɔ de n' nyɛ nyiile asa ilaa. Fɛɛ agyɛbi anun ɔkara ne nan kyu nyiile asa ilaa mɔ, i boran sa me don ibono nan dalaa agyɛbi nwe nfonɛɛ nfonɛɛ ne mɛ mɛn nu gɛsɛ mɔ.

20 Mɛ-nanboana Yesu asonbo, fɛ laa sa nwɔnsa kyu lii Wurubuaare ilaa so mɔ, fɛn sa fɛ' sa nwɔnsa fɛɛ nbii. Fɛn sa fɛ' sɛɛ ilaa nyɛnyɛn giwɔra dɔ. Nwɔnsa gisa dɔ berɛ, fɛ' wɔra fɛɛ abelɛnsɛ.

21 Wurubuaare gi tɔgɛ mɔ-nbara ɔwɔlɛ mɔ dɔ gɛnɔɔbono ɔ laa kyu ɔkpa pɔbɔrɔ so tɔgɛ wɔra mɔ-adɛ de mɛ' nu mɔ asɛ mɔ. ɔ tɔgɛ yɛɛ,

“Nan tɔngɛ de fɛyɛ kyu naa de

abono fɛ mɛn kya nu ɔmɔ-ndɛ mɔ so.

Nan kyu asafo nnɔ kyu tɔngɛ sa fɛyɛ.

Imɔ-rɛ imɔ gɛnɛn gbaa mɔ, fɛ mɛn taa nu mɛ asɛ.”

Wurubuaare ne n tɔgɛ gɛnɛn.

22 ɔ tɔgɛ gɛnɛn mɔ, i kya nyiile yɛɛ Wurubuaare gi kyu ndɛ nbono mɛn kya nu gɛsɛ mɔ kyu tɔngɛ de abono mɛ mɛn kya nu mɔ asɛ mɔ daa. ɔ kya laare i' lɛɛ mɔmɔ-gisomaanu nyiile ɔmɔ. Wurubuaare ikalan ginu tɔgɛ mɔ berɛ i gyɛ sa daa asa abono mɛ kya son mɔ Wurubuaare mɔ.

23 Imɔso nɛngyɛnɛ fɛɛ fɛyɛ Wurubuaare asonbo mɔ pɛwu fɛ gyan' ne fɛyɛ pɛwu fɛ kya kyu Wurubuaare Oduduu mɔ ɔlon fɛ kya tɔngɛ de ndɛ nbono fɛn kya nu mɔ, fɛ kya wɔra gɛnɛn

ne asa giyan abɛɛ abono mɛ mɛŋ kya son Wurubuaare mɔ mɛ baa tu fɛye mɔ, fɛ mɛŋ nyi yɛɛ mɛ laa tɔgɛ daa yɛɛ fɛ kya lɔ ne?

²⁴ Nengyene fɛɛ Wurubuaare Oduduu mɔ kya yɛgɛ fɛye pɛwu fɛ kya nu ikalan lii Wurubuaare ase ne fɛ kya lɛɛ imɔ tɔgɛ sa asa berɛ daa, ne isa giyan abɛɛ obono ɔŋ kya son Wurubuaare mɔ gi baa tu fɛye genen mɔ, Wurubuaare laa kyu de fɛye so nyiile kaase ilaa nyenyɛn ibono dɔ ɔ bo mɔ. Fɛye pɛwu ilaa tɔgɛsɛ mɔ ne nan bun mɔ gipueɛ mɔ-gisen dɔ.

²⁵ Wurubuaare laa lɛɛ mɔ-gisen dɔ asiiri ilaa nyenyɛn nyiile mɔ. Nfono mɔ, ɔ laa wolaa kyu mɔ-ansi kyu too gɛsɛ de ɔ' dalaa kyu nyisigyɛ sa Wurubuaare. ɔ laa tɔgɛ yɛɛ Wurubuaare bo fɛye dɔ gɛsintin.

Fɛ' Wɔra Ilaa Kamaase ɔkpa So Fɛye-Gɛgyan Dɔ

²⁶ Imɔso me-nanboana Yesu asonbo, nne ne i kaabore fɛ' wɔra imɔ? Nengyene fɛ koola gyan' fɛ laa son Wurubuaare mɔ, Wurubuaare Oduduu mɔ laa sa fɛye dɔ ɔko fɛɛ ɔlon biise de fɛ' bii. Abɛɛ ɔ laa sa ɔko fɛɛ ilaa nyiilese de fɛ' kase. Wurubuaare Oduduu mɔ laa lɛɛ Wurubuaare ɔkalan ɔko nyiile ɔko de fɛ' nu, abɛɛ ɔ laa kpaa ɔko mɔ de ɔ' tɔngɛ de gɛdɛ gɛbono ɔŋ ti nu kerɛ. Abɛɛ ɔ laa yɛgɛ ɔko ɔ' taale lɛɛ genen ilaa tɔgɛsɛ ibono gɛsɛ sa fɛye. Imɔso fɛ' kerɛ imɔ ikamaase so de i' nye lɔrɔ daa fɛye-gikpen mɔ.

²⁷ Nengyene fɛɛ ako mɛ laa tɔngɛ de gɛdɛ gɛbono mɛŋ ti nu kerɛ mɔ, fɛ mɛŋ' yɛgɛ de mɛ' don asa anyɔ abɛɛ asa'. Mɛ laa tɔngɛ mɔ, mɛ'

tongɛ ɔko-ɔko. Ɔko kee ɔ' lɛɛ ibono mɛ kya tɔgɛ mɔ gɛsɛ.

²⁸ Ne fɛɛ fɛ mɛn nyɛ ɔko de ɔ' lɛɛ imɔ gɛsɛ mɔ, fɛ' yɛgɛ de mɛ' sii kurun de mɛ' tɔgɛ daa mɔmɔ-asen dɔ sa mɔmɔ-nyoro de Wurubuaarɛ.

²⁹ Fɛ' yɛgɛ Wurubuaarɛ ikalan atɔgɛbo anyɔ abɛɛ asa' ne mɛ' tongɛ, yɛgɛ asense mɔ mɔ, mɛ kya nu ilaa ibono mɛ kya tɔgɛ mɔ dɔ dandan.

³⁰ Nengyene mɔmɔ dɔ ɔko kya tɔgɛ Wurubuaarɛ ɔkalan ɔko ne Wurubuaarɛ gi kii lɛɛ mɔ-ɔkalan ɔko nyiile ɔbanban mɔ, ɔbono ɔ ti daa ɔ kya tongɛ mɔ o' sii kurun, de ɔnyɔsɛ mɔ ɔ' nyɛ tongɛ.

³¹ Fɛ laa taalɛ tɔgɛ Wurubuaarɛ ikalan ɔko-ɔko de fɛyɛ pɛwu fɛ' nyɛ tɔgɛ; fɛyɛ pɛwu fɛ' nyɛ kase ilaa de i' nyɛ keda fɛyɛ pɛwu nyoro.

³² I kya nyiile yɛɛ nengyene Wurubuaarɛ Oduduu mɔ tɛ ɔko so ɔ kya yɛgɛ mɔ ɔ kya tongɛ Wurubuaarɛ ɔkalan ɔko mɔ, in gɛyɛ yɛɛ kaase mɔ mɛn dɛsɛ. Ɔ kya tongɛ genen pɛwu mɔ, mɔ-gɛwɔnsa gɛ dɛ. Ɔ bo ɔlon Wurubuaarɛ ɔkalan mɔ gitɔgɛ mɔ so.

³³ Wurubuaarɛ mɛn gɛyɛ Wurubuaarɛ yɛrɛ-yɛrɛ. Ɔ gɛyɛ daa gisen yuuli Wurubuaarɛ.

Fɛɛ gɛnɔɔbono i dɛ Yesu asonbo akpen mɔ dɔ pɛwu mɔ:

³⁴ in kaabore akyii mɛ' tongɛ Wurubuaarɛ ɔsonten. In dɛ ɔkpa. Mɛ' bara mɔmɔ-nyoro gɛsɛ sa mɔmɔ-kuliana fɛɛ gɛnɔɔbono Mosisi nbara mɔ gi kya nyiile mɔ.

³⁵ Nengyene mɛ kya laarɛ mɛ' bii ilaa iko lii ɔson mɔ dɔ mɔ, mɛ' kpe mɔmɔ-nwi de mɛ' kpaa

taase mómó-kuliana nno. I bo ipeeli fεε ɔkyii ɔ' tongε Wurubuaare asonbo ɔsonten.

³⁶ Fε kya wɔra fεye-gibaa so nbara faa, imɔso fε nyi yεε Wurubuaare agyebi mɔ a lii daa fεye ase abεε fεye-wole so ne a ba daa?

³⁷ Nengyene fo ɔko fo nyi yεε fo gye Wurubuaare ikalan ɔtɔgebo abεε Wurubuaare Oduduu mɔ kya wɔra ilaa fo dɔ mɔ, i kaabore fo' wu yεε ilaa ibono ne ηmarase sa fεye faa Wurubuaare ne n ka imɔ sa me.

³⁸ Nengyene ɔko gi kine ɔ maη gyi ibono n dare faa so mɔ, fεye bere fε meη sa fε' nu mɔ ase.

³⁹ Me-nanboana Yesu asonbo, fε' pεere ansi de fε' kole Wurubuaare yεε fε' nye nu mɔ-ikalan de fε' kyu tɔge sa asa. In kaabore fε' tii asa yεε me meη baa kyu Wurubuaare Oduduu kyu tongε de ndε nbono me meη ti nu kere mɔ.

⁴⁰ Fε' kere ilaa kamaase so dandan de fε' wɔra imɔ pεwu ɔkpa so kanpe.

15

Yesu Gi Kyingi Lii Ibuni Dɔ

¹ Me-nanboana Yesu asonbo, nan nyingi fεye ɔkalan konkonse ɔbono ne wolaa tɔge fεye kyu lii Yesu so mɔ. Ne lεε ɔkalan mɔ tɔge sa fεye mɔ, fε sɔɔ kyule ne fε kpe san fε de mɔ dɔ.

² Nengyene fε keda ɔkalan baare dɔ ken-ken mɔ, i laa mɔlege fεye de fε' nye Wurubuaare ase gεkyena. Ne fε meη keda genen bere mɔ, gisɔgyi gibono fε bo sa Yesu mɔ gi gye daa giyan.

³ Ɔkalan mɔ agyɛbi abono a tansi a tiri mɔ, me kee nɛ kase amɔ daa pɛi ne nɛ lɔɔ kyu kperɛ fɛye. Imɔ ne n gye yɛɛ:

Yesu Kirisito gi wu' sa aye de ɔ' so aye ilaa nyenyɛn.

Mɛ wolaa ηmarasɛ Wurubuaarɛ agyɛbi mɔ dɔ yɛɛ i laa ba genɛn.

⁴ Mɛ pule mɔ.

Imɔ gɛkɛ sasɛ mɔ, o kii kyingi lii ibuni dɔ.

Mɛ wolaa ηmarasɛ imɔ idɛ kee Wurubuaarɛ agyɛbi dɔ.

⁵ O kyingi genɛn mɔ, ɔ lɛɛ mɔ-nyoro gɛwi nyiile Piita, ne o kii lɛɛ mɔ-nyoro nyiile mɔ-akasebo gudu anyɔ mɔ.

⁶ Imɔ gɛmara mɔ, aye-nanboana Yesu ɔson mɔ dɔ mɛ gyan gɛtɛn kolon, mɛ laa don asa nwɛ nnun, ne Yesu gi lɛɛ mɔ-nyoro nyiile mɔmɔ kee. Owi ɔbono n kya ηmarasɛ ɔwolɛ baarɛ mɔ, mɔmɔ dɔ sakyɔ mɛ san mɛ tɛ de ansi. Mɔmɔ ako berɛ ne n ti wu'.

⁷ Imɔ gɛmara mɔ, ɔ lɛɛ mɔ-nyoro nyiile mɔ-tɛdɛ Gyeemesi pɛi ne o kii lɛɛ mɔ-nyoro nyiile mɔ-isɔɔ mɔ pɛwu.

⁸ Ibono i tiikara mɔ, ɔ lɛɛ mɔ-nyoro gɛwi nyiile me kee. Ɔ lɛɛ mɔ-nyoro nyiile me mɔ, in wɔra fɛɛ asa sɛnsɛ lɛɛ mɔ. I wɔra daa fɛɛ gɛbii gɛbono gɛmɔ-gɛkorogɛ gɛn ti fo ne mɛ korogɛ gɛmɔ mɔ.

⁹ Imɔ gɛsɛ ne n gye yɛɛ Yesu isɔɔ mɔ dɔ mɔ, me ne mɛn fo ɔmɔ. Mɛn kaaborɛ mɛ' tɛrɛ me yɛɛ Yesu ɔsɔɔ gbaa. I kya nyiile yɛɛ nɛ ka Wurubuaarɛ asonbo gikpɛn mɔ ansi yɛgɛ.

¹⁰ Wurubuaarɛ gitolon so ne nɛ nyɛ baa bingiri mɔ-osunbo faa. O su me gitolon gidɛ genɛn mɔ,

i men wɔra giyan. Ne baa wɔra mɔ Wurubuaare gɛsun mɔ ken-ken kii baa don mɔmɔ asense mɔ pɛwu. Nkana man taale wɔra genen me-gibaa so. Wurubuaare ne n kpaa me so ne ne taale wɔra gɛsun genen.

¹¹ Imɔ-rɛ imɔ genen gbaa faa, me ne n lɛɛ Yesu ɔkalan mɔ tɔgɛ daa-o, asense mɔ ne n lɛɛ mɔ tɔgɛ daa-o, aye pɛwu, ɔkalan kolon ne a kya tɔgɛ ne mɔ kee ne fɛye mɔ fɛ sɔɔ gyi.

Wurubuaare Laa Kyingi Yesu Asonbo Lii Ibuni Dɔ

¹² To, aye pɛwu a ti lɛɛ Yesu Kirisito ilaa tɔgɛ sa fɛye yɛɛ o wu' ne Wurubuaare gi kyingi mɔ lii ibuni dɔ, ne fɛye kee fɛ sɔɔ imɔ gyi. Ne idɛ kon, i wonɛ ne fɛye dɔ ako mɛ kii mɛ kya sɔɔ akɔɔlɛ yɛɛ abono mɛ wu' mɔ mɛ man kyingi lii ibuni dɔ?

¹³ Naafɔ Wurubuaare man kyingi abono mɛ wu' ne mɛ ti pule ɔmɔ mɔ lii ibuni dɔ fɛɛ genɔɔbono fɛye dɔ ako mɛ kya tɔgɛ faa mɔ, genen berɛ mɔ, Wurubuaare men taale kyingi Yesu Kirisito lii ibuni dɔ kee ne.

¹⁴ To. Naafɔ Wurubuaare men kyingi Kirisito mɔ, nkana ɔfaanan ilaa ibono a naa a kya tɔgɛ kyu lii mɔ so faa, i gye daa giyan. Nkana ibono fɛ ka gyan mɔ so mɔ kee i gye daa giyan.

¹⁵ Nkana i laa ba yɛɛ a kɛɛ abon gyan' Wurubuaare so ne. I lii fɛɛ aye ne n naa buu sa asa yɛɛ Wurubuaare gi kyingi Yesu lii ibuni dɔ. Ne fɛye mɔ yɛɛ idɛ kon in gye genen faa.

¹⁶ Genen ne fɛ kya nyiile ne. Fɛye yɛɛ Wurubuaare men kya kyingi asa lii ibuni dɔ. Imɔso fɛye ase mɔ, Wurubuaare men kyingi Yesu

Kirisito lii ibuni do kee ne. Abɛɛ in̄ kya nyiile genen?

17 Ne fɛɛ Wurubuaare mɛn̄ kyingi Kirisito lii ibuni do gesintin mo, nkana ibono fo kya soo mo gyi yɛɛ o kpaare fɛye-ilaa nyenyɛn pɛwu fue sa fɛye mo, giyan ne. I laa nyiile yɛɛ fɛ tɛ faa, nkana fɛ san fɛ tɛ de fɛye-ilaa nyenyɛn ne.

18 Genen kee mo i laa nyiile yɛɛ aye-nanboana Kirisito adɛ abono mɛ bingiri Wurubuaare-lɛɛ mo pɛwu mɛ wu' sii gɛkpaɛ ne.

19 Nengyene gɛkyena gɛdɛ do aye-gɛwɔnsa gɛ gyan' yɛɛ Kirisito laa kyingi aye lii ibuni do, ne aye-lɛwu gɛmara berɛ, in̄ ba genen mo, asa pɛwu do mo nkana aye-ilaa ne nan tansi wɔra ayen.

20 Ne taa toɛ ide pɛwu mo, gesintin mo ne n gyɛ yɛɛ Wurubuaare gi kyingi Kirisito lii ibuni do. Mɔmɔ abono pɛwu Wurubuaare gi da gibaa tere mo do mo Kirisito ne n gyangbara kii nyɛ mo-lɛɛ nyoro pobɔɔ. O de daa fɛɛ gigyɔ pobɔɔ gibono mɛ daa gigyangbara kyu too Wurubuaare pɛi de i' loo gbigi mo.

21 Imo gɛsɛ ne n gyɛ yɛɛ nyamesɛ kolon ne n yɛgɛ lɛwu gi ba anyamesɛ do. Genen kee ne nyamesɛ kolon ne n yɛgɛ ne ibuni mɛ laa kii nyɛ nyoro pobɔɔ.

22 I kya nyiile yɛɛ aye-anyamesɛ pɛwu aye-rɛ aye-naana gyangbarasɛ, Adam, a gyɛ nyamesɛ kolon. A kya nyɛ lɛwu fɛɛ Adam-lɛɛ mo onan. Genen kee, aye abono pɛwu aye-rɛ Kirisito a gyɛ nyamesɛ kolon mo, a wu' mo, a laa nyɛ kii kyingi de a' nyɛ aye-nyoro pobɔɔ fɛɛ Kirisito-lɛɛ mo onan.

23 I bo aberɛ abono Kirisito adɛ pɛwu mɛ laa

nye mómó-nyoro póbóró mó. Kirisito ne n wolaa gyangbara kyingi wóra fée gigyo póbóró gibono mé kyu too Wurubuaare. I san asa abono mé gyé mó Kirisito-lee mó bere, owi obono ó laa kii ba mó ne mé laa kyingi de mé' nye mómó-nyoro póbóró.

²⁴ Mé nye mómó-nyoro póbóró genen mó, gésinkpan so gekyena nke laalaalóge mó gi fo ne. Kirisito laa kyu gésinkpan so gëwuragyi pëwu kyu kpaa wóra mó-se Wurubuaare abaa dó. Pëi de ó' wóra genen mó, ó ti wolaa nyida gëwuragyi de olon de gebelense, ibono a kya wu de ansi de ibono aŋ kya wu de ansi mó pëwu.

²⁵ In gyé giyan so ne Kirisito laa nyida imó ideana. I wolaa i gyé daa ilaa ibono Wurubuaare gi tóge kyu lii mó so yéé ó laa gyi gëwura kaabore mó-akyobo pëwu mé' baa ñmii mó-ayaa dó de mé' bara mómó-nyoro gése sa mó.

²⁶ Ókyobo laalaalóge obono ó laa gyi mó so mó ne n gyé léwu.

²⁷ I kya nyiile yéé Kirisito ilaa i wolaa i bo Wurubuaare agyebi dó yéé, “Wurubuaare laa yége ilaa kamaase i' bara imó-nyoro gése sa mó.” Wurubuaare agyebi mó a tóge genen mó, a nyi ibono Wurubuaare bere men bo ilaa ibono i laa bara imó-nyoro gése sa Kirisito mó dó. Mó ne n gyé obono ó laa yége ilaa kamaase i' bara imó-nyoro gése sa Kirisito mó.

²⁸ Owi obono ilaa kamaase i laa bara imó-nyoro gése sa Kirisito, Wurubuaare mó-bi mó genen mó, Kirisito gbaa-gbaa kee laa bara mó-nyoro gése sa Wurubuaare. Wurubuaare, mó, ne n gyé obono ó yége ilaa kamaase i' bara imó-nyoro gése

sa mɔ-bi Kirisito. Imɔso Wurubuaare mɔ-bi mɔ laa baa bara mɔ-nyoro gese sa mɔ-se de i' wɔra yee ilaa kamaase dɔ mɔ, Wurubuaare ne n gye obono okamaase de ilaa kamaase i bo no sa mɔ.

²⁹ Ako me kya gyere asa Wurubuaare sagyere yii abono me ti wu' mɔ giyaa. Nengyene Wurubuaare man kyingi ibuni mɔ, i wonε ne me kya gyere asa Wurubuaare sagyere yii abono me ti wu' mɔ giyaa genen?

³⁰ Ne Wurubuaare man kyingi ibuni mɔ, i wonε so ne me-re me-nanboana a kya kyule wɔra Yesu gesun ne i kya yegε asa me ka aye-ansi owi kamaase dɔ daa? N nyi yee Yesu men kyingi lii ibuni dɔ mɔ, man kyule wɔra genen.

³¹ Me-nanboana Yesu asonbo, n' tɔge feye yee gεke kamaase mɔ asa me kpe me de me ma-a wɔra daa lewu abaa dɔ. Feye-re aye-Wura Yesu Kirisito ginyamese kolon so mɔ, n kya gyiide feye so. Imɔso ne n kya tɔge feye genen ilaa ide faa.

³² Owi oko dɔ mɔ, ne kɔ de ndonbue Efiso osowole so. Nengyene fee anyamese-leε ilaa wole ne n tiri me mɔ, mene ne nan nye lii imɔ dɔ? Nengyene a nyi yee a man kyingi lii ibuni dɔ de a' nye nteela mɔ, nkana ofaanan a kya nu de gedε gebono me kya tɔge yee:

“A' tεε gyi de a' nun.

Ɔke ofaanan a wu'” mɔ.

³³ Fe men sa fe' yegε de oko ɔ' nye feye penε.

“Anyamese nyenyen dɔ gisaare

i kya nyida nyamese dense gikyenabi.”

³⁴ Imɔso fe' dese feye-nyoro so de fe' kyu Yesu asonbo akyenabi kyu kyena kanpe. Feye dɔ ako

mε μεη nyi Wurubuaare mómó-asen dó. N' buu sa feye yεε genen ilaa ide i gye ipeeli ilaa sa feye.

Wurubuaare Dó Lεε Nyoro Onan

³⁵ Fofibii mó, fo oko fo laa tóge yεε, “Nne so nne so ne Wurubuaare laa kyingi asa lii ibuni dó daa? Mómó-nyoro gi laa wóra nne?”

³⁶ Fo obono fo tóge genen mó, fo μεη nyi ólaako. Imóso fo μεη nyi yεε abi abono fo kya duu mó a kya daa gigyó pɛi de a' lóó kóró de a' nye nkpa pobóró?

³⁷ Ibono fo kya kyu duu mó kɛi, ne ibono i laa kóró de i' sóró mó kee kɛi. Ilaa ibono fo duu mó, i gye gibi giyan fεε giyu abεε giwayu gibi.

³⁸ Wurubuaare ne n kya sa gimó nyoro pobóró genóobono ó kya laare mó. Gibi kamaase gimó-oyuduu gimó-rε gimó-nyoro pobóró onan obono ó kya kaabore gimó mó.

³⁹ Ilaa ibono pɛwu i kya sɔnga mó nyoro i kóró i kóró. Anyamese nyoro kɛi. Nbuε-lεε kɛi. Nbuui-lεε kɛi, ne iken kee lεε kɛi.

⁴⁰ I bo Wurubuaare dó lεε nyoro onan, ne i bo gεsinkpan so lεε nyoro onan. Wurubuaare dó lεε nyoro mó nyisigyí kɛi, ne gεsinkpan so lεε nyisigyí kee kɛi.

⁴¹ Owi bo mó-lεε nyisigyí kɛi. Bose bo mó-lεε kɛi, ne agyεkɛbi kee a bo amó-lεε kɛi-kɛi. I kya nyiile yεε agyεkɛbi gbaa nyisigyí a don abara.

⁴² Genen kee ne i de ne. Anyamese mε laa kyingi lii ibuni dó de mε' nye nyoro pobóró mó, mómó-nyoro nbono a kya pule mó gi kya gyó.

Nyoro nbono Wurubuaare laa sa abono me laa kyingi lii ibuni do mo bere gi man gyo kpa-a.

⁴³ Nyoro nbono a kya pule mo, nmɔ-re ipeeli ne. Nyoro nbono gi laa kyingi mo bere ne nan nye nyisigyi. Me pule aye mo, a gye daa afɔlebo. Wurubuaare laa kosore aye mo, a laa wɔra alolonbo.

⁴⁴ Gekyena gedɛ do-leɛ nyoro onan ne me kya kyu pule. Oduduu do-leɛ nyoro onan ne Wurubuaare laa kyu kosore aye. I kya nyiile yɛɛ i bo gekyena gedɛ do-leɛ nyoro onan, genen kee ne i bo oduduu do-leɛ nyoro onan.

⁴⁵ Wurubuaare agyɛbi do i kya tɔge yɛɛ, “Wurubuaare gi pɔɔ nyamese gyangbarase, Adam, ne o nye onɛ, o te nkpa.” Adam tiikarase, Kirisito mo bere, Wurubuaare gi yɛge o nye Oduduu o kya yɛge asa me kya nye Wurubuaare ase gekyena.

⁴⁶ I men gye oduduu do ilaa ne Wurubuaare gi daa gisa anyamese. Nkpa ne Wurubuaare gi daa gisa anyamese pei ne o loo kyu mo-Oduduu mo ilaa kyu sa omo.

⁴⁷ Nyamese gyangbarase, Adam mo gi lii daa gesinkpan do. O gye daa ise. Adam nyɔse, aye-Wura Kirisito mo bere, gi lii daa Wurubuaare do.

⁴⁸ Gesinkpan so gekyena ilaa do mo, anyamese me de daa fee nyamese gyangbarase mo. Me gye daa ise. Ne Wurubuaare do lee gekyena ilaa do mo, anyamese abono me kya ka gyan Kirisito so mo me laa wɔra daa fee mo. Me laa wɔra Wurubuaare do asa.

⁴⁹ Genɔobono a daa giwɔra fee obono o gye ise mo oyuduu mo, genen ne a laa baa wɔra fee

ɔbono ɔ gyɛ Wurubuaare dɔ isa mɔ oyuduu kee ne.

⁵⁰ Me-nanboana Yesu asonbo, n kya buu mi-i sa fɛye yɛɛ aye anyamesɛ gesinkpan so-lɛɛ nyoro de nkalan oyuduu mɔ i man taale kyena Wurubuaare ase mɔ-gɛwuragyi mɔ dɔ. Ilaa ibono i kya gyɔ mɔ, i man taale sɔɔ ilaa ibono i man gyɔ mɔ ilaa keda.

⁵¹ Fɛ' yela giso de fɛ' nu ilaa boduduuse iko. I mɛn gyɛ aye pɛwu ne nan wu' lɛwu. I laa baa fo owi ɔko mɔ, Wurubuaare laa keda aye pɛwu kyɛɛɛɛ.

⁵² gikolon. I fo genen mɔ, Wurubuaare dɔ gɛgandan laalaalogɛ mɔ gɛ laa su. Gɛ su mɔ, fo baa kerɛ mɔ, Wurubuaare gi ti wolaa keda aye kyɛɛɛɛ. I lii fɛɛ gɛgandan mɔ gɛ laa su mɔ, asa abono mɛ ka gyan Yesu so pɛi ne mɛ wu' mɔ, Wurubuaare laa kyu nyoro nbono gi man gyɔ mɔ kyu sa ɔmɔ de o' kyingi ɔmɔ. Aye abono a san a tɛ de ansi genen owi ɔbono mɔ kee, Wurubuaare laa keda aye kyɛɛɛɛ.

⁵³ I lii fɛɛ aye-nyoro nbono gi kya gyɔ mɔ gi tiri yɛɛ gi' nyɛ nbono gi mɛn kya gyɔ mɔ ɔnan kyu suu de nmɔ-nyoro. I tiri kee yɛɛ aye-nyoro nbono gi kya wu' mɔ gi' nyɛ nbono gi mɛn kya wu' mɔ ɔnan kee kyu suu de nmɔ-nyoro.

⁵⁴ Gɛkaako mɔ Wurubuaare laa yɛɛ genen ilaa ibono i' ba. Aye abono a kya ka gyan Yesu so mɔ nyoro nbono gi kya gyɔ mɔ gi laa nyɛ kyu oyuduu ɔbono ɔ mɛn kya gyɔ mɔ kyu suu de nmɔ-nyoro. Aye-nyoro nbono gi kya wu' mɔ gi laa nyɛ kyu oyuduu ɔbono ɔ mɛn kya wu' mɔ kyu suu de nmɔ-nyoro. I ba genen mɔ, nfono

ne Wurubuaare agyebi ako a laa nye ba gesintin. Amo ne n gye yee,

“Lewu men baa o bo no. A ko lii gekpaa.

⁵⁵ O Lewu, n' kere fo-olon obono nkana fo bo fo kya gyi aye so mo?

O Lewu, n' kere fo-ogyoo obono nkana fo bo fo kya da aye mo?”

⁵⁶ Lewu ogyoo ne n gye anyamese ilaa nyenyen giwora. Ne ilaa nyenyen giwora mo i kya nye lewu olon lii daa Wurubuaare nbara mo do.

⁵⁷ A kya faala Wurubuaare. Mo ne nan lee aye lii lewu olon do kyu naa de aye-Wura Yesu Kirisito so.

⁵⁸ Imoso me-nanboana laarese Yesu onon mo do, fe' yee feye-ayaa so ken-ken feye-gisogyi gibono fe bo sa Yesu mo do de ilaa iko in sa o' yoo feye-nyoro baa pii. Fe' kpe fa-a wora Wura Yesu gesun owi kamaase do. I kya nyiile yee fe nyi yee ilaa kamaase ibono fe kya wora fe kya sa Wura Yesu mo, i menan wora giyan.

16

Genobono Fe Laa Too Aterenbi Sa Yesu Asonbo Abono I Tiri Omomom

¹ Nan baa toge aterenbi ilaa sa feye kon. Fe laa too too-too kyu kpaa kpaa' Yesu asonbo abono i tiri omomom, feye kee fe' wora fee genobono ne nyiile Yesu asonbo abono me bo Galati osowole so mo.

² Kosida-Kosida mo feye okamaase o' lee aterenbi ako lii abono o nye mo do de fe' loro amoyela. Ne san ba feye ase mo, in baa wora feye poroko.

³ Fɛ ti too yela ne nɛ ba mɔ, nan yɛgɛ fɛ' lɛɛ asa abono fɛye gbaa-gbaa fɛ sɔɔ mɔmɔ gyi mɔ de mɛ' kyu aterenbi mɔ kpe Gyɛrusalem. Nan n̄marasɛ iwolɛ ibono i laa lɛɛ mɔmɔ nyiile nno awura mɔ de mɛ' kyu keda de aterenbi mɔ kpe.

⁴ Nengyene i gyɛ ibono me kee n' kpe daa mɔ, me-rɛ ɔmɔ a laa kpe.

Ikpa Ibono Pɔɔlo Yɛɛ ɔ Laa Kpe Mɔ

⁵ Nan naa de Masadoniya gɛsinkpan so de n' baa faala fɛye, i kya nyiile yɛɛ Masadoniya ne nan naa de.

⁶ Nɛ ba mɔ, fonɓii mɔ nan gyi nkɛ fɛye asɛ. I laa taalɛ ba yɛɛ nan kyena fɛye asɛ awo abere mɔ dɔ pɛwu gbaa. Nan kyon mɔ, de fɛ' lɛɛ me-ɔkpa de n' taalɛ kpe nfono so nan kpe de mɔ.

⁷ Mɛn̄ kya laarɛ fɛɛ n' baa loo lii. Wurubuaarɛ gi kyule mɔ, n kya laarɛ n' gyi nkɛ fɛye asɛ.

⁸ Nan sii kyena Efiso gɛrɛ kaabore a' gyi aye Gyuda awura Agyudo Akɛbibere Gɛsi mɔ.

⁹ I lii fɛɛ nɛ wu yɛɛ Wurubuaarɛ gi bugi ɔkpa sa me gɛsintin so de n' nyɛ wɔra mɔ-gɛsun mɔ gɛrɛ. Abono mɔ mɛ kya laarɛ de mɛ' tii me-gɛsun mɔ ɔkpa mɔ kee mɛ kyɔ.

¹⁰ Timoti gi ba fɛye asɛ mɔ, fɛ' yɛgɛ i' wɔra mɔ fɛɛ ɔ loo daa mɔ-gɛwi. ɔ kya wɔra Wura Yesu gɛsun mɔ fɛɛ gɛnɔɔbono me kee n kya wɔra faa.

¹¹ Imɔso fɛ mɛn̄ sa fɛ' n̄manyɛn mɔ. ɔ laa kii mɔ, fɛ' lɛɛ mɔ-ɔkpa de gisen yuuli de ɔ' baa tu me de alanfiya. N kya kerɛ mɔ-rɛ aye-nanboana Yesu asonbo mɔ ako ɔkpa.

¹² Aye-nanbo Apolose berɛ, nɛ buɛlɛ mɔ yɛɛ o' buu aye-nanboana abono de mɛ' kpaa laa fɛye

mɔ, nɛ kpon. N kya tɔgɛ mɔ mɔ, ɔ kpɛ ɔ dɛ daa yɛɛ ɔ laa kpe berɛ, mɔ, i mɛŋ gye nperɛ. Imɔso aberɛ mɔ a fo mɔ, ɔ laa ba fɛye asɛ.

Agyɛbi Laalaalogɛ

¹³ Fɛ' bii fɛye-nyoro akedabi. Fɛ' yelɛ fɛye-gikagyan gibono fɛ ka gyan Yesu so mɔ dɔ kenken. Fɛ' da otu wɔra mɔ-gɛsun mɔ. Fɛ' keda nyoro.

¹⁴ Ilaa kamaasɛ ibono fɛ laa wɔra gɛnen mɔ, fɛ' kyu gɛlaarɛ' wɔra imɔ pɛwu.

¹⁵ Me-nanboana Yesu asonbo, fɛye gbaa-gbaa fɛ nyi yɛɛ Akaya gɛsinkpan pɛwu so mɔ, Sitɛfanasɛ gɛten dɔ asa ne n daa gikyu mɔmɔ-nyoro too Yesu so, ne mɛ kyu ɔmɔ-nyoro kyɛɛ mɛ kya kerɛ Yesu asonbo so.

¹⁶ N kya kolɛ fɛye yɛɛ fɛ' bara fɛye-nyoro gɛsɛ sa gɛnen asa abono ɔnan. Fɛ' bara fɛye-nyoro gɛsɛ kee sa isa kamaasɛ ɔbono ɔ kya wɔra gɛsun de i' kpaa fɛye mɔ abɛɛ ɔ kya yiyɛɛ fɛye so mɔ.

¹⁷ Fɛye-nanboana, Sitɛfanasɛ de Fɔtunatusɛ de Akayakusɛ mɛ ba me asɛ mɔ, i wɔra me ɔkon gikyɔ. Fɛŋ bo me asɛ faa mɔ, mɔmɔ ne n san baa yii fɛye-giyaa sa me.

¹⁸ Mɛ yɛgɛ me-gisen gi tɔrɔ me. N nyi ibono mɛ yɛgɛ fɛye-asen a tɔrɔ fɛye kee gɛnen. Fɛ' lɛɛ gɛnen asa abono ɔnan ginyen.

¹⁹ Wurubuaarɛ asonbo akpen abono a bo Esiya gɛsinkpan so mɔ pɛwu mɛ kya faala fɛye. Akuila de Pirisika de Wurubuaarɛ asonbo gikpen gibono mɛ kya kyena gyan' mɔmɔ-gɛten dɔ mɔ pɛwu mɛ kya faala fɛye gikyɔ Yesu ginyen dɔ.

²⁰ Aye-nanboana Yesu asonbo mɔ pɛwu mɛ kya faala fɛye. Fɛ' kyu genyi-abi afaala faala abara fɛɛ genɔɔbono i kaabore Yesu asonbo mɛ' faala abara mɔ.

²¹ Nɛ sin gere. Me, Pɔɔlo gbaa-gbaa ne n dɛ me-gibaa n kya nmarase ilaa tiikarase idɛ n kya sa fɛye.

²² Ɔbono ɔ mɛn kya laare aye-Wura Yesu ilaa mɔ, kaase mɔ-rɛ Wurubuaare abaa anyɔ. Aye-Wura Yesu, a kya kole fo, kii ba gesinkpan so!

²³ Wura Yesu ɔ' sa fɛye so gɛwɔnsa dɛnsɛ.

²⁴ Kirisito Yesu ginyen dɔ mɔ, n dɛ gelaare' n kya kale fɛye pɛwu.

GenḐ PobḐrḐ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2025-04-25

PDF generated using Haiola and XeLaTeX on 25 Apr 2025 from source
files dated 25 Apr 2025

4cc402b4-139a-5f33-9af9-fbf62307f663